

佛說無量壽經概疏

顯明大師法集

傳持天台教觀第四十五代



顯明念法大師相

自序

國運、教運注定我的命運，生來孤苦，與佛有緣。十二歲出家，就讀哈爾濱極樂寺佛學養成所，民國二十年，時年十五歲，於營口楞嚴寺，禪定老和尚座下受具足戒。遂至寧波觀宗講寺親近寶靜法師，於觀宗寺弘法研究社畢業後，擔任輔講、主講。並於香港弘法精舍輔講任內，蒙寶公傳授天臺宗正法，為傳持天臺教觀第四十五代。余受觀宗法乳，得佛隴真傳，生平以教觀總持，說默蓄於二六時中。至於稍盡棉力，護國衛教等事，樂觀長老著『中國佛教近代史論集』——法侶評傳，稱『白山黑水一奇僧』，暨廣嚴法師撰，中國佛教會出版『高山仰止』，予以披露，當之有愧。

來到臺灣，先後於汐止慈航佛學院、中壢佛學院、南光女眾佛學院、三藏佛學院、東山佛學書院、法光寺佛學研習會、中華佛學院、菩提佛學院等教授佛學。現仍任臺北華嚴專宗學院、中國內學院、能仁佛學院、福嚴佛學院教席，暨妙清佛學院導師、主講。其間所講課業及在各大專院校佛學社部分講錄及開示等，由學員筆記，彙編十一種，計教觀綱宗講記、天臺四教儀要釋、始終心要略釋、楞伽經要解、勝鬘經要解、四十二章經要解，心經、彌陀經、盂蘭盆經等講記，大乘起信論義疏、八識規矩頌講記等，商予付印流通，藉報四恩。非屬著作，豈圖傳聞，願求不違心、不違生、不違佛耳。

四明觀宗講寺臺北別院顯明念法識 民國六十八年三月二十日

佛說無量壽經概疏

曹魏康僧鎧譯

佛隴後裔念法講

天台釋經，七番（標章令易憶持起念心，引證據佛語起信心，生起使不雜亂起定心，開合料簡會異等起慧心故，觀心即聞即行起精進心故。）共解，五重（名體宗用教）各說，詳如法華玄義。四義（因緣、約教、本迹、觀心）釋文，法華文句曰：『一因緣、二約教、三本迹、四觀心，始從如是終於而退，皆以四意消文，而今略書或三二一，貴在得意，不煩筆墨。』因緣釋即四悉檀（一世界悉檀歡喜益，二為人悉檀生善益，三對治悉檀破惡益，四第一義悉檀入理益，原出智論，龍樹用以判釋尊教化一代衆生之方法。），例「如是」爲一經事實，聞之歡喜，是世界因緣釋，「如是」是信順義，舉阿難之信，起人之善，是爲人因緣釋，「如是」異外道經首冠阿漚（有無）是對治因緣釋，「如是」爲真如離非，是第一義因緣釋。約教釋，例一心爲意識，約藏教釋。一心爲賴耶，約通教釋。一心爲如來藏，約別教釋。一心爲三千諸法，約圓教釋。佛出釋氏宮，約迹釋，壽量品云成佛久遠，約本釋。觀心釋者，例佛在某處，處唯心現，解佛住處，即衆生之心，佛說法義，寄衆生一心，而觀實相之理，能觀所觀一心，能禮所禮空寂，斯謂性具之不二門。

五重玄義

（一）釋名：此經以單人立題。「佛說」：釋迦爲能說。「無量壽」：彌陀爲所說，佛者覺也，有本覺，迷之爲不覺，悟之爲始覺，惑盡爲究竟覺。覺者智也，有一切智、道種智、一切種智，三智一心爲智圓。彌陀從壽彰名，壽有真應，真即常住，性同虛空，此佛壽長曰無量，以有補佛，驗爲應壽。釋迦應身，但壽量品又莫測其本地，總之，因因果覺具三德秘藏，一三相即者謂佛。經者梵語修多羅具云契經，有歷法明經，訓法、訓常之義不贅述。

（二）顯體：此經以發菩提心理融於事，實相爲體。

(三)明宗：此經以是心作佛，是心是佛，淨土因果信願行為宗。

(四)論用：此經以都攝六根專心繫念迴向願求為用。

(五)判教：此經以大乘方等圓頓為教相。

曹魏康僧鎧譯

梵名僧伽跋摩，又名僧伽婆羅，印度人，於曹魏嘉平五年來華，在洛陽白馬寺譯無量壽經。

我聞如是，一時佛住王舍城耆闍崛山中，與大比丘眾萬二千人俱。

本經始終文別有三，序正流通，從聞如是至對曰唯然願樂欲聞為序分。

從佛告阿難乃往過去久遠無量下至我今為汝略說之耳為正宗分。從佛告彌勒其有得聞彼佛名號下至文末為流通分。從首至一時來會為六種成就，名證信序。爾時世尊諸根悅豫下至願樂欲聞，係一經緣起名發起序。

「如是我聞」：為佛陀四種遺囑（以戒為師、四念處為住、惡性默摈、經首安如是我聞）之一。如是本性彌陀，唯心淨土，是法成就，我聞性本包容何妨取捨，是聞成就。「一時」：東土西乾天上人間時差不一為息諍論，時成就。「佛住」：佛為教主成就，佛無所住，心體虛曠不礙往來。「王舍城」：梵語羅閱祇，在中印度摩伽陀國，有五山圍城，第一為靈鷲山，畢波羅窟結集即在此城外。「耆闍崛山」：即靈鷲山。為處所成就。「與大比丘眾萬二千人俱」：此為眾成就，比丘翻除饑男，含乞士、怖魔、破惡三義，位高無學名大。

一切大聖，神通已達，其名曰尊者了本際，尊者正願，尊者正語，尊者大號，尊者仁賢，尊者離垢，尊者名聞，尊者善實，尊者具足，尊者牛王，尊者優樓頻螺迦葉，尊者伽耶伽葉，尊者那提迦葉，尊者摩訶迦葉，尊者舍利弗，尊者大目犍連，尊者刼賓那，尊者大住，尊者大淨志，尊者摩訶周那，尊者滿願子，尊者離障，

尊者流灌，尊者堅優，尊者面王，尊者異乘，尊者仁性。尊者嘉樂，尊者善來，尊者羅雲，尊者阿難，皆知斯等上首者也。

列舉三十二名，有德可尊，曰尊者，諸羅漢名，皆就德用事理立號，各譯本所用華梵不同。「了本際」：即僑陳如。「正願」：出家得道標名。

「正語」：語無四過得名。「大號」：美名遐布立名。「仁賢」：德性軟和彰名。「離垢」：具戒，離染成名。「名聞」：梵語耶舍，佛後百年摩竭陀國雞園寺上座。「善實」：從內德為名。「具足」：以受戒表名。「牛王」：僑梵波提之譯名，餘經譯為牛呬、牛跡、牛相等。「優樓頻螺迦葉」：譯曰木瓜林，迦葉姓也。「伽耶迦葉」：譯曰城。「那提迦葉」：譯河或江，上三人為兄弟。「摩訶迦葉」：譯飲光，頭陀第一，付法藏第一祖。「舍利弗」：此云身子，小乘智慧第一。「目犍連」：目連是姓，此云採菽氏，神通第一。「刼賓那」：此云房宿，僑薩國人，能知星宿，僧中第一。「大住」、「大淨志」：均從內定得名。「周那」：純陀、准陀、淳陀之異名。譯曰妙義，佛自此人受最後供養。「滿願子」：富樓那之翻名，說法第一。「離障」：阿那律佛之堂弟，天眼第一。「流灌」：取流水灌頂義。「堅伏」：就堅意伏惑取名。「面王」：就神變為名。「異乘」：大小互異。「仁性」：寂滅行仁。「嘉樂」：尚三昧樂。「善來」：佛向願出家者稱善來比丘。「羅雲」：佛之嫡子，在胎六年，生於成道夜，十五歲出家，密行第一。「阿難」：具云阿難陀，此云歡喜，佛之堂弟，二十五歲出家，侍佛二十五年，多聞第一。先列聲聞眾，後彰菩薩名。阿難神通雖未達，但為此會請主，故併列。

又與大乘眾菩薩俱，普賢菩薩，妙德菩薩慈氏菩薩等此賢劫中一切菩薩，又賢護等十六正士，善思議菩薩，信慧菩薩，空無菩薩，神通華菩薩，光英菩薩，慧上菩薩，智幢菩薩，寂根菩薩，願慧菩薩，香象菩薩，寶英菩薩，中住菩薩，制行菩薩，解脫菩薩，皆尊普賢大士之德，具諸菩薩無量行願，安住一切功德之法，遊

步十方，行權方便，入佛法藏，究竟彼岸，於無量世界，現成等覺。

大智文殊、大行普賢、慈氏彌勒等爲賢劫中成佛之菩薩。等者，指賢劫中其餘菩薩。過去名莊嚴劫，未來名星宿劫，現在名賢劫，拘留孫第一，拘那含牟尼第二，迦葉佛第三，釋迦居四，彌勒爲五，最後爲樓至佛。「賢護」：大方等大集賢護經曰，王舍城有優婆塞，名曰賢護，爲衆上首。佛說大乘菩薩藏正法經，有賢護長者品。「十六正士」：又名十六開士，卽賢護等十六居士菩薩，經論顯密所舉不同，其名號多就因中德行而立。「善思議」：內德深達，善會眞宗。「信慧」：信根發慧。「空無」：觀空無不捨大悲。「神通華」：分身十方一念普至。「光英」：智光之最。「慧上」：大寶積經三十八有慧上菩薩問大善權經。「智幢」：賢劫十六尊之一，以破戲論爲德。「寂根」：不動爲本。「願慧」：願慧悉成滿得爲三界雄。「香象」：賢劫十六尊之一。「寶英」：寂照焦柱。「中住」「制行」：別教解行屬賢位，圓教住行聖位。「解脫」：離縛自在。歎齊普賢入法界十地行願，曰「遵普賢大士之德，具諸菩薩無量行願。」證理窮心曰「安住」。「遊步十方行權方便」：歎權智。「入佛法藏究竟彼岸」：歎實智。「於無量世界現成等覺」：權實眞理起用。

處兜率天，宏宣正法。於彼天宮，降神母胎。從右脅生，現行七步，光明顯耀，普照十方，無量佛上，六種震動，舉聲自稱，吾當於世，爲無上尊，釋梵奉侍，天人歸仰。示現算計文藝射御，博宗道術，貫練羣籍。遊於後園，講武試藝，現處宮中，色味之間。見老病死，悟世非常，棄國財位，入山學道，服乘白馬，寶冠瓔珞，遣之令還，捨珍妙衣，而著法服，剃除鬚髮，端坐樹下，勤苦六年，行如所應。現五濁刹，隨順羣生，示有塵垢，沐浴金流，天按樹枝，得攀出池，靈禽翼從，往詣道場，吉祥感徵，表

章功祚，哀受施草，敷佛樹下，跏趺而坐。奮大光明，使魔知之，魔率官屬而來逼試，制以智力，皆令降伏。得微妙法，成最正覺。釋梵祈勸，請轉法輪。以佛遊步，佛吼而吼，扣法鼓，吹法螺，執法劍，建法幢，震法雷，曜法電，澍法雨，演法施，常以法音覺諸世間。光明普照無量佛土，一切世間六種震動，總攝魔界，動魔宮殿，衆魔懾怖，莫不歸伏。擲裂邪網，消滅諸見，散諸塵勞，壞諸欲壅，嚴護法城，開闡法門，洗濯垢汙，顯明清白，光融佛法，宣流正化。入國分衛，獲諸豐饍，貯功德，示福田。欲宣法，現欣笑，以諸法藥救療三苦，顯現道意，無量功德，授菩薩記成等正覺。示現滅度，拯濟無極，消除諸漏，植衆德本，具足功德，微妙難量，游諸佛國，普現道教。

本節文爲八相成道，佛佛道同，示同人法，如彌勒現居兜率補處。「處兜率天」：爲欲界第四天，翻知足，有內外院，內院三災不及，故涅槃釋勝。「宏宣正法」：菩薩聖說默然爲諸天六時說法。此爲處天宮相。「捨彼天宮降神母胎」：爲行慈運悲，故捨樂降神，觀時人壽百歲，觀地世界中土（中天竺迦毘羅衛），觀種剎帝利，觀處正慧入摩耶胎。小乘見乘白象（表大力能荷），大乘見坐樓閣（表色心無礙），法須王護，寄生剎利，留世福田，故遺舍利，此爲入胎相。（八相中大乘無降魔有住胎，小乘無住胎有降魔）。「從右脅生」：生處示異凡穢。四月八日於藍毘尼園摩耶右脇出生。按釋氏通鑑爲周昭王甲寅二十六年（公元前一〇二七年），此爲出胎相。「現行七步」：表七大自然，或應七覺。「六種震動」動起涌震吼擊。文句記三之一云：『有六緣地動，入胎出胎出家成道法輪入滅。』「舉聲自稱」：天上天下唯我獨尊，永恒不變自在我。「釋梵奉侍」：六欲天主爲帝釋，三界天主爲梵王。以上爲出生後所現奇特，不可以凡情度聖境。「示現算計文藝射御博通道術貫練羣籍」：示現新學六藝，釋氏通鑑云，當年七歲，詣師學習世間書典。「講武試藝」：釋氏通鑑云，十歲學射。「現處宮中色味之間」：

釋氏通鑑云，十七歲納妃。佛祖統記云：納妃有三，瞿夷、耶輸、鹿野。羅雲爲耶輸所生。「見老病死悟世非常，棄國財位入山學道，服乘白馬，寶冠瓔珞遣之令還，捨珍妙衣，而著法服，剃除鬚髮，端坐樹下，勤苦六年。」：十九歲出城，四門遊觀，於東南西，見老病死，生厭離心，北門見僧，生欣樂心，二月八日夜，由車匿引馬出城至檀特山，自以寶劍絕其鬚髮，淨居天人奉僧伽黎，入彌樓山阿藍迦處習不用處定三年，二十二歲遷鬱頭藍弗處習非非想處定，二十五歲到象頭山與外道食麻麥，三十歲思苦行非正解脫，至尼連河沐浴受乳糜。坐菩提樹下，十二月八日明星出時成道。以上年代依釋氏通鑑。據孤山頌：『十九踰城六苦行，五年遊歷三十成，說法度生五十年，是則共當八十壽。』妙樂云，若十九出家則二十四成道，若三十成道，則二十五出家。瑞應經云：『指妃腹云，却後六年汝當生男。』又世尊回王宮，王云：『去國十二年』。大聖現跡，會釋不一。「行如所應」：其所應學，順而行之。以上爲出家相。「五濁」：命濁短壽，生濁善少，煩惱結重，我見深沉，劫災刀兵。穢土名五濁。「沐浴金流」：金沙河（尼連河）中沐浴形垢。表以定慧之水斷除結使。「天按樹枝」：攀之出池。「靈禽翼從」：經中說五百青鳥隨從佛後。「往詣道場」：修道之場，指菩提樹下。「吉祥感德」：吉祥童子獻草，瑞徵吉祥。「祚」：音坐，運也。「跏趺而坐」：左腳置右腳上，再將右腳置左腳上，次以左手掌置右手上，重累相對。「奮」：放也。「使魔知之」：貪瞋等煩惱不起，五陰自共相不生，證無生，不見生死。唯他化天魔，佛將成道，放光動地魔宮搖動，再有空行夜叉輾轉傳告，率衆來惱，佛以正智不爲強軟所動，故曰「皆令降伏」。此爲降魔相。「得微妙法，成最正覺」：此爲成道相。藏教三祇修福百劫種相，觀諦緣度，三十四心（八忍八智九無礙九解脫）頓斷見思正習無餘，坐木菩提樹下，以生草爲座，成劣應身。通教機緣若熟，以一念相應斷餘殘習，坐七寶菩提樹下，以天衣爲座，現帶劣勝應身。別教破十二品無明入妙覺，坐大寶華王座現圓滿報身。圓教破四十二品無明登涅槃山頂，以虛空爲座，成清淨法身佛。「釋梵祈勸請轉法輪」：此下爲轉法輪相。寶積經九曰，賢劫千佛均由梵王請法，金剛力士護衛。「以佛遊步」：大士示同眞佛身業化。「佛吼而

吼」：菩薩效佛口業化。「扣法鼓，吹法螺，執法劍，建法幢，震法雷，曜法電，澍法雨，演法施。」：此八句約喻顯法，前四譬合爲聞思修證，後四譬喻四無礙智（法無礙，義無礙，辭無礙，樂說無礙。）又扣鼓表集衆，吹螺表改惡，執劍喻斷結，建幢譬降魔，法雷動無明，法電能照了，澍雨能潤澤，法施益衆生。「常以法音覺諸世間」：總結以上身口起化。世間包括依正覺道三種世間。「光明普照無量佛土，一切世界六種震動，總攝魔界，動魔衆，魔懼（同攝）怖，莫不歸伏」：佛身輪放光現通，使魔歸伏。「擣（音國）裂邪網，消滅諸見，散諸塵勞，壞諸欲壟（音欠）嚴護法城，開闡法門，洗習（音濁）垢汙，顯明清白，光融佛法，宜流正化。」：口輪破邪，令離煩惱。邪網諸見，爲見惑，欲壟是思惑，阻空寂，塵勞是塵沙，障化導。垢汙是無明，翳法性。惑散能通，進入華屋，故曰「顯明清白」。「入國分衛，獲諸豐饒，貯功德，示福田。」：分衛，此云乞食。福田，三寶爲敬田，父母師長爲恩田，衆生爲悲田。供養三寶孝順父母師長救濟貧窮，能積功德，種福田。「欲宣法，現欣笑，以諸法樂救療三苦，顯現道意，無量功德，授菩薩記成等正覺。」：從釋梵祈勸至此，爲說法相。包括如來一代時教，藏教世益，故欣笑。通教三乘共，調療三苦（苦苦、壞苦、行苦）。別教無量功德。圓教授記作佛。「示現滅度，拯濟無極，消除諸漏，植衆德本，具足功德，微妙難量，遊諸佛國，普現道教。」：般涅槃相。釋氏通鑑云：世尊七十九歲當周穆王五十三年（公元前九四九年）壬申二月十五日，於拘尸那城，娑羅雙樹間，右脇而臥，於其中夜，寂然無聲，便般涅槃。世尊雙林示滅，以滅跡方便，令生善滅惡，法華壽量品良醫治子失心疾，非滅現滅。故云：「消除諸漏，植衆德本」。法身不生滅，報身相莊嚴，應化隨機感。法身如空中月體，報身如水中月影，月印千江，實無來去。「具諸功德，微妙難量」：結前本門實智。「遊諸佛國，普現道教」：結前跡門權智。下文嘆前菩薩兩利功德。

其所修行，清淨無穢，譬如幻師，現衆異像，爲男爲女，無所不變，本學明瞭（音了），在意所爲，此諸菩薩亦復如是，學一切

法，貫綜縷練，所住安諦，靡不感化，無數佛土，皆悉普現，未曾慢恣，恣傷衆生，如是之法，一切具定。

聞思「修」信解「行」修行，乃上求下化的德本，本節文略歎菩薩二行。「清淨無穢」：內不執我，外不著法，罪性本空，因心有染，再觀過去如夢，未來如雲，現在不住，心既不得，罪穢焉有。「譬如幻師，現衆異像，爲男爲女，無所不變，本學明瞭，在意所爲，此諸菩薩亦復如是。」：緣起幻現，建築在清淨無穢上，所謂以無爲法而有差別，根本智契理爲本學，後得智起用，是在意所爲。「學一切法」：法門無量誓願學。「貫綜縷練」：法貴貫通綜理熟審，含施廢開意。「所住安諦，靡不感化」：無住生心，寂而常照。「無數佛土，皆悉普現」：施權。「未曾慢恣恣傷衆生」：平等大悲。

菩薩經典，究暢要妙，名稱普至，道御十方。

前二句是自利，後二句嘆利他。經典要在究義暢行，妙在研教入理。由教行理而證「道」，興慈運悲，願「御」十方。

無量諸佛，咸共護念，佛所住者，皆已得住，大聖所立，而皆已立。如來道化，各能宣布，爲諸菩薩而作大師，以甚深禪慧，開導衆生，通諸法性，達衆生相，明了諸國。

前六句是自利，如來道化下，嘆利他。自性不離是「護念」。什師譯小本彌陀經其原名爲稱讚不可思議功德一切諸佛所護念經。奘師譯曰，稱讚淨土佛攝受經，均含護念義。別地圓住爲分眞住，等妙二覺爲究竟住，因賅果，果徹因，因心果覺與佛同住。大聖世尊所立不出止觀二門，從假入空，從空出假，眞俗互容，中道理顯，爲菩薩同修共立。「如來道化各能宣布」：四無礙辯說法同佛。「爲諸菩薩而作大師」：益人同佛，大師者，四教儀集註曰，羣生模範。以道訓人，師通凡聖，唯佛師聖，簡之曰大。「以甚深禪慧開導衆生」：禪止慧觀。導入薩婆若海。「通諸法性，達衆生相，明了諸國。」頓悟正因，百川會海。衆生相多，其性唯一，塵刹國土，因心而成。

供養諸佛，化現其身，猶如電光，善學無畏之網，曉了幻化之法。壞裂魔網，解諸纏縛。

前五句明自利，後二句明利他。「供養諸佛」：修福。「現化其身」：起行。「猶如電光」：小本云：『其土衆生，常以清旦，各以衣祴，盛衆妙華，供養他方十萬億佛，卽以食時還到本國。』「善學無畏之網」：佛四無畏，一切智無畏，漏盡無畏，說障道無畏，說盡苦道無畏。「曉了幻化之法」：離有無性，自共相。「壞裂魔網，解諸纏縛。」：魔網是邪業，纏縛爲五住。

超越聲聞緣覺之地，得空無相無願三昧。善立方便。顯示三乘，于此化終而現滅度。

前二句明自行，後四句顯益他。聲聞修四諦以苦諦爲初門，緣覺修十二因緣，以集諦爲初門。均以斷四住通惑爲目地。別地圓住分斷無明，則超二乘地。「空無相無願三昧」：卽三三昧，又名三解脫（涅槃）門。人法二無我，緣生無性，謂空。得空不滯空，度生離四相，謂無相，任運斷證，無念願求，謂無願，又名無作。法華經信解品：『世尊往昔說法既久，我時在座，身體疲懈，但念空無相無作。』「善立方便，顯示三乘」：法華經方便品：『我有方便力開示三乘法。』「於此化終而現滅度」：二乘開顯，方便品云，正直捨方便，但說無上道。唯此一事實餘二則非眞。有譯本「於此中下而現滅度」：中是緣覺，下是聲聞，說小乘涅槃果。

亦無所作，亦無所有，不起不滅得平等法。具足成就無量總持，百千三昧，諸根智慧，廣普寂定，深入菩薩法藏。得佛華嚴三昧，宣揚演說一切經典。

最後一句是自利他，餘文爲自利。「無所作」：無修。「無所得」：無證。「不起不滅」：無淨可起，無垢可滅。「平等法」：眞如界內絕生佛之假名，平等慧中無自他之形相。「總持」：梵語陀羅尼，謂菩薩所修之念定

慧具此功德，有法總持、義總持、咒總持、忍總持四種。「百千三昧」：智論云，初名首楞嚴三昧，乃至虛空不染不著三昧，廣說則無量三昧。「諸根智慧」：信進念定慧五根。「廣普寂定」：所證寂定普廣。「菩薩法藏」：深入法藏。「得佛華嚴三昧」：以一眞法界無盡緣起爲理趣，一心修之謂三昧，莊嚴佛果，調華嚴，三昧卽調直定。

住深定門，悉觀現在無量諸佛，一念之頃，無不周徧。濟諸劇難，諸閑不閑，分別顯示眞實之際，得諸如來辯才之智，入衆言因，開化一切。

本節文仍是歎菩薩德。「住深定門，悉觀現在無量諸佛」：華嚴、法華、楞嚴、念佛等三昧卽深定，寂照一如，智理相應，於一念頃卽見諸佛。「劇難」：八難爲諸難劇，人中有四（盲聾瘡啞，世智辨聰，佛前佛後，北俱盧洲。）長壽夫（色界無想天，壽長五百大劫，無色界非想非非想天，壽長八萬劫。），三途。「諸閑不閑」：人天苦微曰諸閑，菩薩爲不請之友，曰不閑。或別圓外凡伏惑位是閑，名字位不閑。「分別顯示眞實之際」：證法教人。「得諸如來辯才智」：得佛四無礙辯。「入衆言音」：瞭解衆生根性念欲。「開化一切」：知病與藥，無化導之障。

超過世間諸所有法，心常諦住度世之道，於一切萬物而隨意自在，爲諸庶類作不請之友，荷負羣生，爲之重擔。

「超過世間諸所有法」：解脫無生智，越二乘斷證，住深定以佛智度衆，菩薩所成智斷二德，非世間法可比。「心常諦住度世之道」：佛菩薩以救世爲主，異二乘自了。「於一切萬物隨意自在」：觀諸法得自在，不被物轉，所謂無心於萬物，何愁萬物常圍繞。「爲諸庶類作不請之友」：庶類卽凡夫，以凡類迷心，習性所使，不知聞法做諸功德，而菩薩無問自說，引導向善。待請方說，表重法，不請而說，表大悲。「荷負羣生爲之重擔」：勝鬘經云，大地持四重擔（海喻菩薩、山喻緣覺、草木喻聲聞、衆生喻凡夫。）大地牢固難傾，喻菩薩行體牢固。生長萬物，喻菩薩廣生物善，擔荷山河，

喻菩薩荷負衆生。

受持如來甚深法藏，護佛種性，常使不絕，興大悲，愍衆生，演慈辯，授法眼，杜三趣，開善門，以不請之法施諸黎庶，如純孝之子愛敬父母，於諸衆生視若自己。一切善本皆度彼岸，悉獲諸佛無量功德，智慧聖明不可思議，如是之等菩薩大士，不可稱計，一時來會。

「受持如來甚深法藏」：卽如來藏性，止觀輔行云：『能觀心性，名爲上定。』「護佛種性，常使不絕」：金剛碑云：『佛果具自他之因性，我心具諸佛之果德。』佛種從緣起，則一心具十法界，護之則十界一心。維摩經云：『諸佛解脫當於衆生心行中求。』不絕之理自顯。「興大悲愍衆生」：明拔苦因果。「演慈辯授法眼」：明與樂因果。法眼觀俗諦。「杜三趣開善門」：法藏第一願卽杜三趣，繫念往生卽開善門。「於諸衆生視若自己」：大經云：『衆生卽是佛，若離衆生不得菩提。』華嚴云，心佛衆生三無差別，所以菩薩度自性衆生。「一切善法皆度彼岸」：法華云，舉手低頭皆得成佛。恭敬三寶敬田。孝順父母恩田，教助貧困悲田，皆是善法。善法有性修，彼岸有事理。「大士」：菩薩之通稱。金光明以佛爲大士。「一時來會」：爲法心同。上來列衆歎德。下文如來現相發起。

爾時世尊，諸根悅豫，姿色清淨，光顏巍巍。尊者阿難，承佛聖旨，卽從座起，偏袒右肩，長跪合掌而白佛言。今日世尊諸根悅豫，姿色清淨，光顏巍巍，如明鏡淨，影暢表裏，威容顯耀，超絕無量，未曾瞻覩殊妙如今。

如來現相，阿難請問，爲此經別序。「爾時」：機教相扣，列衆來會之時。「世尊」：十號之一，佛具萬德，世所尊重。「諸根」：六根。「悅豫」：安樂逸豫。「姿色清淨」：色無慘感。「光顏巍巍」：和顏悅色，嚴肅中現慈祥。佛陀將說淨業正因，除障勝行，剖塵出卷，橫超之法，故現斯

相。「尊者阿難」：阿難爲調達胞弟，與羅雲同年。「承佛聖旨」：蒙佛允許。「卽從座起」：含從空出假起用之義。「偏袒右肩」：西域禮節。佛法順右，平時衣裹兩肩，遇請法懺悔應供時，則袒露右肩，如此方披袈裟式。「長跪合掌」：跪於地，表實相理地，印度禮法有互跪——左右兩膝交互跪地，長跪——兩膝據地。合掌，大日經疏三曰：『左手是三昧義，右手是般若義，十指是十波羅密滿足義。』

唯然大聖，我心念言，今日世尊住奇特之法，今日世雄住諸佛所住，今日世眼住導師之行，今日世英住最勝之道，今日天尊行如來之德，未來現在佛佛相念，得無今佛念諸佛耶。何故威神光光乃爾。

阿難請問以心念。「世尊世雄世眼世英世尊」：均爲佛陀法號。「奇特之法」：佛十力四無畏，世所無者。「諸佛所住」：大雄行健，無住而住。涅槃寂靜，菩提覺法。「導師之行」：住於五眼引導衆生照見無過。導師爲佛菩薩通稱。法華序品云：『文殊師利，導師何故眉間白毫大光普照。』湧出品曰：『是四菩薩於其衆中最爲上首，唱導之師。』「住最勝之道」：無上菩提爲最勝道，唯佛能證，曰世英。「行如來之德」：五天（涅槃云：一世天，謂人王天子。二生天，謂四王乃至非想。三淨天，謂須陀洹及辟支佛。四義天，謂菩薩解諸法空寂義。五第一義天，謂佛如來解知佛性不空義。）中之第一義天，故云天尊。行如來德者，十力無畏十八不共五眼六通四無礙等。「未來現在佛佛相念」：念佛所爲，佛佛道同。「得無今佛念諸佛耶」：釋迦如此恐餘佛亦然。「何故威神光光乃爾」：舉所疑結問。

於是世尊，告阿難曰，云何阿難，諸天教汝來問佛耶，自以慧見問威嚴乎。阿難白佛，無有諸天來教我者，自以所見問斯義耳。佛言善哉阿難，所問甚快，發深智慧，眞妙辯才，愍念衆生，問斯慧義，如來以無盡大悲，矜哀三界，所以出興于世，光闡道教，

欲拯濟羣萌，惠以真實之利，無量億劫，難值難見，猶靈瑞華，時時乃出，今所問者，多所饒益，開化一切諸天人民。

「慧義」：如來現瑞欲說淨土，彼土乃是慧境界。「矜」：音今，憐惜義。「三界」：欲界六天（四王、忉利、夜摩、兜率、化樂、他化）五趣雜居，以欲愛爲本。色界十八天，又名四禪天（離生喜樂、定生喜樂、離喜妙樂、捨念清淨），斷欲食以禪定淺深論高下。無色界四天，又名四空定天（空無邊、識無邊、無所有、非非想），無色無物以心意識修釋。「道教」：以佛道教化。「靈瑞華」：梵語，優曇華，又云優曇波羅華。

阿難當知，如來正覺，其智難量，多所導御，慧見無礙，無能遏絕，以一餐之力，能住壽命億百千劫，無數無量復過於此，諸根悅豫，不以毀損，姿色不變，光顏無異。所以者何，如來定慧，究暢無極，於一切法而得自在。阿難諦聽，今爲汝說，對曰，唯然，願樂欲聞。

「正覺」：梵語三菩提，如來之實智也。「其智難量」：顯佛智勝。

「導御」：明智廣。「遏」：音厄，阻止也。「一餐之力」：隨化示受一餐之力，明不待資能住多劫，約化顯實。身無「毀損」，明佛體常。「諸根悅豫」明常德。「姿色不變」明常命。「光顏無異」：明常定。約實顯化。得此勝慧常身，係如來定慧究竟，暢達無邊，其心自在所致。阿難諦聽下，是勅聽許說，阿難奉教聽受，文顯可知。上來序分竟。

佛告阿難，乃往過去久遠無量不可思議無央數劫，錠光如來興出於世，教化度脫無量衆生，皆令得道乃取滅度。次有如來名曰光遠，次名月光，次名栴檀香，次名善山王，次名須彌天冠，次名須彌等曜，次名月色，次名正念，次名離垢，次名無著，次名龍天，次名夜光，次名安明頂，次名不動地，次名瑠璃妙華，次名

瑠璃金色，次名金藏，次名炎光，次名炎根，次名地種，次名月像，次名日音，次名解脫華，次名莊嚴光明，次名海覺神通，次名水光，次名大香，次名離塵垢，次名捨厭意，次名寶炎，次名妙頂，次名勇立，次名功德持慧，次名庇（蔽）日光，次名日月瑠璃光，次名無上瑠璃光，次名最上首，次名菩提華，次名月明，次名日光，次名華色王，次名水月光，次名除癡冥，次名度蓋行，次名淨信，次名善宿，次名威神，次名法慧，次名鸞音，次名師子音，次名龍音，次名處世，如此諸佛皆悉已過，爾時次有佛，名世自在王如來、應供等正覺、明行足、善逝、世間解、無上士、調御丈夫、天人師、佛、世尊。

此下是正宗分。文舉過去五十四尊古佛，最後一佛爲法藏親承。

佛立名，或取因取果，或性或相，或取所願衆德之名，故智者大師釋經，少解佛名，以佛名具衆德，不可以一德稱之。「無量不可思議無央數」：中國有十百千萬億兆京垓秭穰溝澗正載各數。印度有十大數（無數、無量、無邊、無等、不可數、不可稱、不可思、不可量、不可說、不可說不可說），梵語阿僧祇，此云無央數。「過去劫」：現在是賢劫，未來星宿劫，過去名莊嚴劫。「錠光佛」：梵語提洹羯佛，卽燃燈佛。（有足曰錠、無足曰燈，作定非）輔行之一曰：『瑞應云至于昔者定光佛舊時，我爲菩薩，名曰孺童，乃至買華奉錠光佛，散華供養，華住空中，佛知其意，而讚嘆言，汝無數劫所學清淨，因記之曰，汝自是後九十一劫，劫號爲賢，汝當作佛，名釋迦文。』「世自在王」：爲佛別號。「如來」：佛陀十種通號之一。金剛般若云：『無所從來亦無所去。』法身體。轉法輪經云：『第一義名如，正覺名來。』報身相。成實論云：『乘如實道來成正覺。』應身用。金光明玄云：『理法聚名法身，智法聚名報身，功德法聚名應身。』觀經疏云：『法身非壽不壽無始無終，報身一得永得有始無終，應身示同生滅有始有終。』華嚴頌曰：『十方諸如來，同共一法身，一身一智慧，力無畏亦然。』「應

供」：應受供養。「等正覺」：卽正徧知。「明行足」：三明萬行圓滿。

「善逝」：智論云：『修伽、陀，翻好去。』一切智爲大車，八正道行人涅槃。「世間解」：如實知三世間。「無上士」：智無等，無過上者。「調御丈夫」：佛爲大丈夫善駕御衆生心行。「天人師」：爲天上地上有情無情所有類生，解義之修行師表。「佛世尊」：如常解。

時有國王，聞佛說法，心懷悅豫，尋發無上正眞道意，棄國捐王，行作沙門，號曰法藏，高材勇哲，與世超異，詣世自在王如來所，稽首佛足，右繞三匝，長跪合掌，以頌讚曰，光顏巍巍，威神無極，如是炎明，無與等者，日月摩尼，珠光燄耀，皆悉隱蔽，猶如聚墨，如來顏容，超世無倫，正覺大音，響流十方，戒聞精進，三昧智慧，威德無侶，殊勝希有，深諦善念，諸佛法海，窮深盡奧，究其涯底，無明欲怒，世尊永無，人雄師子，神德無量，功勳廣大，智慧深妙，光明威相，震動大千。願我作佛，齊聖法王，過度生死，靡不解脫，布施調意，戒忍精進，如是三昧，智慧爲上，吾誓得佛，普行此願，一切恐懼，爲作大安，假令有佛，百千億萬，無量大聖，數如恒沙，供養一切，斯等諸佛，不如求道，堅正不却。譬如恒沙，諸佛世界，復不可計，無數剎土，光明悉照，徧此諸國，如是精進，威神難量，令我作佛，國土第一，其衆奇妙，道場超絕，國如泥洹，而無等雙，我當愍哀，度脫一切，十方來生，心悅清淨，已至我國，快樂安隱。幸佛明信，是我眞證，發願於彼，力精所欲，十方世尊，智慧無礙，常令此尊，知我心行，假令身止，諸苦毒中，我行精進，忍終不悔。

「無上正眞道意」：菩提心。「沙門」：翻勤息，釋子通稱。「法藏」：彌陀因地德號，蘊藏佛法之意。「稽首佛足」：頭面接足禮。「右繞三匝」：

禮佛朝聖儀規。「頌」：長行文後再以偈頌體裁重複敘述曰重頌，所頌與前文無關聯曰孤起頌。四句爲一偈。文中前七偈歎佛德（初兩偈半歎佛身業，次有半偈歎佛口業，後兩偈半歎佛意業，最後一偈半結歎佛德。）願我作佛至堅正不却五偈，求佛法身（初一偈願求佛果，次二偈願求佛因，後兩偈校量顯勝。）。譬如恒沙至快樂安隱五偈，求佛淨土（初三偈半自求，後一偈半攝他）。幸佛信明至終忍不悔三偈，求佛證知（初半偈請世自在佛爲已作證，次有半偈更興願心，次有一偈請十方佛爲已證，最後一偈重起願心。）「猶如聚墨」：說日月等光對佛光明猶若聚墨在珂貝（珂者美石，貝者貝殼之美者，五印以爲貨幣使用）邊。「戒聞精進三昧智慧」：舉德體。「法海」：如來藏性。「布施調意戒忍精進如是三昧智慧爲上」：布施對慳貪曰調意，現六度以智慧爲上。「泥洹」：不生滅涅槃。「無等雙」：第一。

佛告阿難，法藏比丘說此頌已，而白佛言，唯然世尊，我發無上正覺之心，願佛爲我廣宣經法，我當修行，攝取佛果清淨莊嚴，無量妙土，令我於世速成正覺，拔諸生死勤苦之本，佛告阿難，時自在王佛語法藏比丘，如所修行，莊嚴佛土，汝自當知。

法藏先請，後佛反答，「修行」「攝取」「拔苦」顯法藏心願所爲。

「勤苦之本」：勤苦本因，由因數受生死之苦果。「汝自當知」：違請之言。

比丘白佛，斯義宏深，非我境界，唯願世尊，廣爲敷演諸佛如來淨土之行，我聞此已，當如說修行，成滿所願，爾時自在王佛，知其高明，志願深廣，卽爲法藏比丘而說經言，譬如大海，一人斗量，經歷劫數，尚可窮底，得其妙寶，人有志心精進，求道不止，會當剋果，何願不得，於是世自在王佛，卽爲廣說二百一十億諸佛剎土，天人之善惡，國土之粗妙，應其心願，悉現與之。時彼比丘，聞佛所說嚴淨國土，皆悉覩見，起發無上殊勝之願，其心寂靜，志無所著，一切世間無能及者，具足五劫，思惟攝取

莊嚴佛國清淨之行，阿難白佛，彼佛國土，壽量幾何，佛言，其佛壽命四十二劫，時法藏比丘，攝取二百一十億諸佛妙土清淨之行。

法藏重請，如來爲說。「斯義」：卽前文出世之行，如所修行莊嚴佛土成佛濟衆。「如說修行」：依教奉行。法藏願深行廣，「寂靜」「無著」爲五劫攝取妙土淨行之本。「天人之善惡」：善惡淨穢之因。「國土之粗妙」：粗妙諸土之果。「二百一十億諸佛妙土」：僅現妙土者，係「應其心願」。

如是修已，詣彼佛所，稽首禮足，繞佛三匝，合掌而住，白佛言世尊，我已攝取莊嚴佛土清淨之行、佛告比丘、汝今可說、宜知是時，發起悅可一切大衆，菩薩聞已，修行此法，緣至滿足無量大願，比丘白佛，唯垂聽察如我所願，當具說之。設我得佛，國有地獄餓鬼畜生者，不取正覺。設我得佛，國中天人，壽終之後，復更三惡道者，不取正覺。設我得佛，國中天人，不悉眞金色者，不取正覺。設我得佛，國中天人，形色不同，有好醜者，不取正覺。設我得佛，國中天人不識宿命，下至知百千億那由他諸劫事者，不取正覺。設我得佛，國中天人不得天眼，下至見百千億那由他諸佛國者，不取正覺。設我得佛，國中天人不得天耳，下至聞百千億那由他諸佛所說，不悉受持者，不取正覺。設我得佛，國中天人不得見他心智，下至知百千億那由他諸佛國中衆生心念者，不取正覺。設我得佛，國中天人不得神足，於一念頃，下至不能超過百千億那由他諸佛國者，不取正覺。設我得佛，國中天人若起想念貪計身者，不取正覺。設我得佛，國中天人不住定聚必至滅度者，不取正覺。設我得佛，光明有限量，下至不照百千

億那由他諸佛國者，不取正覺。設我得佛，壽命有限量，下至百千億那由他劫者，不取正覺。設我得佛，國中聲聞有能計量，乃至三千大千世界衆生悉成緣覺於百千劫悉共計校，知其數者，不取正覺。設我得佛，國中天人壽命無能限量，除其本願修短自在，若不爾者，不取正覺。設我得佛，國中天人乃至聞有不善名者，不取正覺。設我得佛，十方世界無量諸佛不悉咨嗟稱我名者，不取正覺。設我得佛，十方衆生至心信樂欲生我國，乃至十念若不生者，不取正覺，唯除五逆毀謗正法。設我得佛，十方衆生發菩提心，修諸功德，至心發願欲生我國，臨壽終時，假令不與大眾圍繞現其人前者，不取正覺。設我得佛，十方衆生聞我名號，繫念我國，植衆德本，至心迴向欲生我國，不果遂者，不取正覺。設我得佛，國中天人不悉成滿三十二大人相者，不取正覺。設我得佛，他方國土諸菩薩衆來生我國，究竟必至一生補處，除其本願自在所化，爲衆生故，被弘誓鎧，積累德本，度脫一切，遊諸佛國，修菩薩行，供養十方諸佛如來，開化恒沙無量衆生，使立無上正眞之道，超出常倫諸地之行，現前修習普賢之德，若不爾者，不取正覺。設我得佛，國中菩薩承佛神力供養諸佛，一食之頃，不能徧至無量無數那由他諸佛國者，不取正覺。設我得佛，國中菩薩在諸佛前，現其德本，諸所求欲供養之具，若不如意者，不取正覺。設我得佛，國中菩薩不能演說一切智者，不取正覺。設我得佛，國中菩薩不得金剛那羅延身者，不取正覺。設我得佛，國中天人一切萬物，嚴淨光麗形色殊特，窮微極妙無能稱量，其諸衆生，乃至逮得天眼，有能明了辨其名數者，不取正覺。設我

得佛，國中菩薩乃至少功德者，不能知見其道場樹無量光色高四百萬里者，不取正覺。設我得佛，國中菩薩若受讀經法，諷誦持說，而不得辯才智慧者，不取正覺。設我得佛，國中菩薩智慧辯才，若可限量者，不取正覺。設我得佛，國中清淨，皆悉照見十方一切無量無數不可思議諸佛，世界猶如明鏡覩其面像，若不爾者，不取正覺。設我得佛，自地以上至於虛空，宮殿樓觀池流華樹，國中所有一切萬物皆以無量雜寶百千種香，而共合成，嚴飾奇妙，超諸天人，其香普熏十方世界，菩薩聞者皆修佛行，若不爾者，不取正覺。設我得佛，十方無量不可思議諸佛世界衆生之類，蒙我光明觸其體者，身心柔軟超過天人，若不爾者，不取正覺。設我得佛，十方無量不可思議諸佛世界衆生之類，聞我名字，不得菩薩無生法忍諸深總持者，不取正覺。設我得佛，十方無量不可思議諸佛世界，其有女人聞我名字、歡喜信樂、發菩提心，厭惡女身，壽終之後，復爲女像者、不取正覺。設我得佛，十方無量不可思議諸佛世界諸菩薩衆，聞我名字，壽終之後，常修梵行，至成佛道，若不爾者，不取正覺。設我得佛，十方無量不可思議諸佛世界諸天人人民，聞我名字，五體投地，稽首作禮，歡喜信樂，修菩薩行，諸天世人莫不致敬，若不爾者，不取正覺。設我得佛，國中天人欲得衣服，隨念卽至，如佛所讚應法妙服，自然在身，有求裁縫擣染浣濯者，不取正覺。設我得佛，國中天人所受快樂，不如漏盡比丘者，不取正覺。設我得佛，國中菩薩隨意欲見十方無量嚴淨佛土，應時如願，於寶樹中皆悉照見，猶如明鏡覩其面像，若不爾者，不取正覺。設我得佛，他方國土諸菩

薩衆，聞我名字，至於得佛，諸根缺漏不具足者，不取正覺。設我得佛，他方國土諸菩薩衆，聞我名字，皆悉逮得清淨解脫三昧，住是三昧，一發意頃，供養無量不可思議諸佛世尊，而不失定意，若不爾者，不取正覺。設我得佛，他方國土諸菩薩衆，聞我名字，壽終之後，生尊貴家，若不爾者，不取正覺。設我得佛，他方國土諸菩薩衆，聞我名字，歡喜踊躍，修菩薩行，具足德本，若不爾者，不取正覺。設我得佛，他方國土諸菩薩衆，聞我名字，皆悉逮得普等三昧，住是三昧，至於成佛，常見無量不可思議一切如來，若不爾者，不取正覺。設我得佛，國中菩薩，隨其志願所欲聞法，自然得聞，若不爾者，不取正覺。設我得佛，他方國土諸菩薩衆，聞我名字，不即得至不退轉者，不取正覺。設我得佛，他方國土諸菩薩衆，聞我名字，不即得至第一忍第二第三法忍，於諸佛法不能即得不退轉者，不取正覺。

四十八願總攝有三：一、攝法身有十二、十三、十七三願。二、攝淨土有三十一、三十二兩願。三、攝衆生餘四十三願。「發起悅可一切大眾」：益凡夫二乘願生其國。「菩薩聞已」：益菩薩同發此願。「地獄惡鬼畜生」：三惡道。法苑珠林云，餓鬼、地獄有菩薩憫之，教以念佛，皆不成聲，或以佛字寫其手掌，字不能現。「不取正覺」：諸願不滿終不成佛。「想念貪計身」：想念爲別惑，貪計身爲通惑，第十願卽漏盡通。「定聚」：三聚之一，卽正定聚，三乘行人各修其因，正得其果位，又名不退位。俱舍論十曰：『正邪不定聚，聖造無間餘。』預流以上聖者爲正定聚，造五無間業等爲邪定聚，修七方便行者爲不定聚。起信論說，十信已前之凡夫不信因果爲邪定，十位以上爲正定，十信之人爲不定性。「聲聞」：修四聖諦。「緣覺」：修十二因緣。「十念」：無量壽經記云，依彌勒所問經十法起念，非稱名十念。其十念卽慈心、悲心、護法心、決定心、不染利養心、一切智心、尊重心、

不生味著心、不生散亂心、正念觀佛。此十念亦為念佛者之條件，觀經下品下生十念稱名得往生，要在信樂繫念欲生，義不相違。「五逆」：殺父、殺母，殺阿羅漢、出佛身血、破和合僧。「一生補處」：四教菩薩各近究竟極位之處。此指最後生菩薩用金剛智斷生相無明成佛之身。「普賢之德」：即普賢行願。「德本」：諸功德由供養起。「一切智」：三智之一，即空智。「那羅延」：天上力士之名，涅槃經疏翻金剛，真諦云：『那羅翻人，延為生本，或梵天王異名。「咨嗟」：上讀資，下音決，讚嘆之聲。「無生法忍」：天臺觀經疏曰，無生忍是別初地圓初住。「清淨解脫三昧」：住此三昧，則普見一切諸佛。「第一第二第三法忍」：法位云，仁王經五忍（伏忍、地前三賢位、習種性種道種。信忍，初二、三地。順忍，四、五、六地。無生忍，七、八、九地。寂滅忍，十及佛地。）中前三忍。憬興無量壽經連義述文贊云，伏忍中之下中上。玄一無量壽經紀云，即本經下明音響柔順無生三忍。「不退轉」：四教斷見惑不墮凡位者名位不退。斷思惑並破塵沙，不墮二乘者，名行不退，斷無明者，名念不退。

無量壽經前後有十二譯本（見佛學大辭典五百二十一頁五存七欠條），其中第二、三、四、十一、十二、五種譯本中，讀誦講解者，以曹魏康僧鎧所譯無量壽經為正本，且四十八願古今流通。接摩訶阿彌陀經哀論云：『魏譯四十八願，唐譯四十六願，宋譯三十六願，漢吳二譯皆止二十四願，天親菩薩無量壽偈亦云誓二十四章，則西天本同也。』

佛告阿難，爾時法藏比丘說此願已，以偈頌曰，我建超世願，必至無上道，斯願不滿足，誓不成等覺，我於無量劫，不為大施主，普濟諸貧苦，誓不成等覺，我至成佛道，名聲超十方，究竟有不聞，誓不成等覺，離欲深正念，淨慧修梵行，志求無上尊，為諸天人師，神力演大光，普照無際土，消除三垢冥，明濟眾厄難，開彼智慧眼，滅此昏盲暗，閉塞諸惡道，通達善趣門，功祚成滿足，威耀朗十方，日月戢重暉，天光隱不現，為眾開法藏，廣施

功德寶，常於大眾中，說法師子吼，供養一切佛，具足衆德本，願慧悉成滿，得爲三界雄，如佛無礙智，通達靡不照，願我功德力，等此最勝尊。斯願若剋果，大千應感動，虛空諸天神，當雨珍妙華。

約前所發四十八願再立誓言，共有十一偈文，前三偈自要，再七偈順求，後一偈請證。「超世願」：求法身、求淨土、攝衆生。「靡」：音米，無也。「爲大施主普濟諸貧苦」：包括財法無畏等施。「離欲深正念，淨慧修梵行」：修因。「志求無上尊，爲諸天人師」：求果。「消除三垢冥，明濟衆厄難」：小乘法化。貪瞋癡爲三毒垢。「開彼智慧眼滅此昏盲暗」：大乘法化。「閉塞諸惡道通達善趣門」：人天法化。「祚」：音坐，福也。「戢」：音集，攝也。「日月戢重暉，天光隱不現」：顯光之勝。佛光普照，日月攝光，不能外照。「衆德本」：萬行之中檀那爲首，四攝之行，布施爲初，是以供養爲衆德本。

佛語阿難，法藏比丘說此頌已，應時普地六種震動，天雨妙華以散其上，自然音樂空中讚言，決定必成無上正覺。於是法藏比丘具足修滿如是大願，誠諦不虛，超出世間深樂寂滅。阿難，法藏比丘於其佛所，諸天魔梵龍神八部大眾之中，發斯弘誓，建此願已，一向專志莊嚴妙土，所修佛國，開廓廣大，超勝獨妙，建立常然，無衰無變，於不可思議兆載永劫，積植菩薩無量德行。不生欲覺瞋覺害覺，不起欲想瞋想害想，不著色聲香味觸法，忍力成就，不計衆苦，少欲知足，無染恚癡，三昧常寂，智慧無礙，無有虛偽諂曲之心，和顏愛語，先意承問，勇猛精進，志願無倦，專求清白之法，以惠利羣生，恭敬三寶，奉事師長，以大莊嚴，具足衆行，令諸衆生功德成就，住空無相無願之法，無作無起，

觀法如化。遠離粗言，自害害彼，彼此俱害，修習善語，自利利人，人我兼利，棄國捐王，絕去財色，自行六波羅密，教人令行。無央劫數，積功累德。隨其生處，在意所欲，無量寶藏，自然發應，教化安立無數衆生，住於無上正眞之道，或有長老居士豪姓尊貴，或爲刹利國君轉輪聖帝，或爲六欲天主，乃至梵王，常以四事供養恭敬一切諸佛，如是功德不可稱說，口氣香潔，如優鉢羅華，身諸毛孔出栴檀香，其香普熏無量世界，容色端正，相好殊妙，其手常出無盡之寶，衣服飲食，珍妙華香，繒蓋幢幡，莊嚴之具，如是等事，超諸天人，於一切法而得自在。

前文明願，本節文明行，先修淨土行。從「不生欲覺」下，修法身行。從「隨其生處」下，明報殊勝。「諸天魔梵龍神八部」：諸天，泛指三界二十八天，欲界他化自在天，色界摩醯首羅天爲魔天，色界初禪爲梵天。天（欲界六天，色界四禪，無色界四空，身具光明故名爲天。）龍（水屬之王）夜叉（飛行空中之鬼神）乾達婆（帝釋俗樂神、譯曰香陰）阿修羅（無酒、非天、無端正、是其譯名，常與帝釋戰鬥之神。）加樓那（金翅鳥，撮龍爲食）緊那羅（譯非人，似人頭上有角，爲帝釋法樂歌神）魔睺羅迦（譯大蟒神、地龍也），八部中、天龍神驗殊勝，故曰天龍八部。「兆載永劫」：兆載爲中國數字，劫爲西域大數。「不生欲覺瞋覺害覺」：地持說覺有八種（欲覺、瞋覺、害覺、親覺、國土覺、不死覺、旅姓覺、輕誣覺），以明所離。「不起欲想瞋想害想」：重複顯離前三覺，未對境預起之思名覺，已對緣生心名想。「空無相無願」：卽三空理，亦是空假中三觀，於前二法無希求願樂之心名「無願」，此三法任運，又名「無作」，不見生相名「無起」，空理諸經增數不同，例言獨空，二無我，三空，維摩說：『空、無相、無作、無起四空。』本經說，空、無相、無願、無作、無起五空，乃至如大品說十八空，涅槃說二十五空，故云「觀法如化」。「四事供養」：衣服飲食臥具湯藥。

阿難白佛，法藏菩薩爲已成佛而取滅度，爲未成佛爲今現在，佛告阿難，法藏菩薩，今已成佛，現在西方，去此十萬億剎，其佛世界，名曰安樂，阿難又問，其佛成道已來，爲經幾時，佛言成佛已來，凡歷十劫，其佛國土，自然七寶，金銀瑠璃珊瑚琥珀磤磳瑪璃，合成爲地，恢廓曠蕩，不可限極，悉相雜廁，轉相間入，光赫烜爛，微妙奇麗，清淨莊嚴，超踰十方一切世界衆寶中精，其寶猶如第六天寶，又其國土無須彌山，及金剛圍一切諸山，亦無大海小海溪渠井谷，佛神力故，欲見則見，亦無地獄餓鬼畜生諸難之趣，亦無四時春夏秋冬夏，不寒不熱，常和調適，爾時阿難白佛言世尊，若彼國土無須彌山，其四天王及忉利天依何而住，佛語阿難，第三炎天乃至色究竟天皆依何住，阿難白佛，行業果報不可思議，佛語阿難，行業果報不可思議，諸佛世界亦不可思議，其諸衆生功德善力，住行業之地，故能爾耳，阿難白佛，我不疑此法，但爲將來衆生，欲除其疑惑，故問斯義。

本節文略明法藏所成法身淨土之果，與因中所發四十八願相符。文初阿難問法藏爲「已成」、「未成」、「現在」佛身，佛答可知，釋迦彌陀均有補處，爲報化身，因法身體無始終，報身相有始無終，應化用有始有終，三身一體，因賅果徹不可思議。「其佛世界名曰安樂」以下顯淨土。「七寶」：有輪王七寶（馬、象、臣、兵、女、珠、輪），諸人七寶，依普門品金光明，金銀合一，加眞珠。「煜」：音育，光耀。「爍」：音朔，光波內動。「第六天」：欲界頂天。「須彌山」：一小世界之中心，譯曰妙高、妙光、安明、善積、善高等。器世界最下爲風輪，其上爲水輪，其上爲地輪，地上有九山八海須彌居中，水上高三百三十六萬里，山頂爲帝釋所住，山腰分四部洲。「金剛圍山」：卽周圍世界之鐵圍山也，高廣各六百八十萬由旬。「四天王」：帝釋外將，居須彌山腰，六欲天之第一天，東方持國天王（多羅吒），

領乾達婆及毘舍闍神將，護弗婆提人。南增長天王（毘琉璃），領鳩槃荼及薛荔神護閻浮提人。西廣目天王（毘留博叉）領諸龍及富單那，護瞿尼耶人。北多聞天王（毘沙門），領夜叉羅叉，護鬱單越人。「忉利天」：譯曰三十三天，欲界六天中之第二，在須彌山頂，天人身長一由旬，壽一千歲（世間百年爲一日夜）四方各有八天，中間名喜見城，帝釋所居，欲界六天皆有淫相，俱舍論頌：『六受欲交（四王忉利形交）抱（夜摩）執手（兜率）笑（化樂）視（他化）淫。』六欲天，四王忉利依地住，夜摩兜率他樂他化屬空居。「炎天」：即欲界中第三夜摩天，譯曰時分、善分、善知時分受五欲樂。「色究竟天」：色界十八天中之頂天，又爲不還果聖人所住五淨居天（無煩、無熱、善現、善見、色究竟）之一，又名那羅延天，有毘舍闍（鬼類）摩醯首羅天，智論二曰：『八臂三眼騎白牛。』有淨居摩醯首羅天，爲十地菩薩將成佛時，在淨居上，色界頂現大自在。

佛告阿難，無量壽佛，威神光明最爲第一，諸佛光明所不能及，或照百佛世界，或千佛世界，取要言之，乃照東方恒沙佛剎，南西北方四維上下亦復如是，或有佛光照於七尺或一由旬，二三四五由旬，如是轉倍，乃至照一佛剎，是故無量壽佛，號無量光佛，無邊光佛，無礙光佛，無對光佛，炎王光佛，清淨光佛，歡喜光佛，智慧光佛，不斷光佛，難思光佛，無稱光佛，超日月光佛，其有衆生遇斯光者，三垢消滅，身意柔軟，歡喜踴躍，善心生焉，若在三途極苦之處，見此光明，皆得休息，無復苦惱，壽終之後，皆蒙解脫，無量壽佛光明顯赫，照耀十方，諸佛國土，莫不聞知，不但我今稱其光明，一切諸佛聲聞緣覺諸菩薩衆，咸共歎譽，亦復如是，若有衆生，聞其光明，威神功德，日夜稱說，至心不斷，隨意所願，得生其國，爲諸菩薩聲聞大衆所共歎譽，稱其功德，

至其最後得佛道時，普爲十方諸佛菩薩歎其光明，亦如今也，佛言，我說無量壽佛光明威神巍巍殊妙，晝夜一劫尚未能盡。

本節文廣明所成佛身，先明佛光，下文明佛壽。「諸佛光明所不能及」：舉劣顯勝。「由旬」：印度里程，大由旬等此方八十里，中由旬等六十里，小由旬等四十里。「一佛刹」：卽一佛所化之土。「無量光佛乃至超日月光佛」：十二德名，廣歎顯勝，「無量」多也，「無邊」廣也，「無礙」自在，「無對」無匹，「炎王」勝餘光，「清淨」無垢，「歡喜」心悅，「智慧」照理，「不斷」常照，「難思」超心想，「無稱」過口議，「超日月光」逾色相。「三垢」：三毒。「劫」：日月歲數調時，成住壞空名劫，人壽自十歲百年增一，至八萬四千歲，再百年減一，至十歲，一增減爲小劫，二十小劫爲中劫，成住壞空四個中劫爲一大劫。

佛語阿難，無量壽佛，壽命長久不可稱計，汝寧知乎，假使十方世界無量衆生，皆得人身，悉令成就聲聞緣覺，都共集會，禪思一心，竭其智力，於百千萬劫，悉共推算，計其壽命長遠之數，不能窮盡知其限極。聲聞菩薩天人之衆，壽命長短亦復如是，非算術譬喻所能知也，又聲聞菩薩其數難量，不可稱說，神智洞達，威力自在，能於掌中持一切世界，佛語阿難，彼佛初會，聲聞衆數不可稱計，菩薩亦然，如大目犍連百千萬億無量無數，於阿僧祇那由他劫，乃至滅度，悉共計校，不能究其多少之數，譬如大海深廣無量，假使有人析其一毛以爲百分，以一分毛沾取一涕，於意云何，其所涕者，於彼大海，何所爲多，阿難白佛，彼所涕水，比於大海多少之量，非巧歷算數言辭譬類所能知也，佛語阿難，如目連等，於百千萬億那由他劫，計彼初會聲聞菩薩，所知數者，猶如一涕，其所不知，如大海水。

又其國土，七寶諸樹，周滿世界，金樹、銀樹、瑠璃樹、玻璃樹、珊瑚樹、瑪瑙樹、碑磲之樹，或有二寶三寶，乃至七寶，轉共合成。或有金樹銀葉華果，或有銀樹金葉華果，或瑠璃樹玻瓈爲葉，華果亦然，或水精樹瑠璃爲葉，華果亦然，或珊瑚樹瑪瑙爲葉，華果亦然，或瑪瑙樹瑠璃爲葉，華果亦然，或碑磲樹衆寶爲葉，華果亦然。或有寶樹，紫金爲本，白銀爲莖，瑠璃爲枝，水精爲條，珊瑚爲葉，瑪瑙爲華，碑磲爲實。或有寶樹，白銀爲本，瑠璃爲莖，水精爲枝，珊瑚爲條，瑪瑙爲葉，碑磲爲華，紫金爲葉，白銀爲實。或有寶樹，水精爲本，珊瑚爲莖，瑪瑙爲枝，碑磲爲條，紫金爲葉，白銀爲實。或有寶樹，珊瑚爲本，瑪瑙爲莖，碑磲爲枝，紫金爲條，白銀爲葉，瑪瑙爲華，水精爲實。或有寶樹，瑪瑙爲本，碑磲爲莖，紫金爲枝，白銀爲條，珊瑚爲葉，水精爲實。或有寶樹，水精爲本，珊瑚爲莖，碑磲爲枝，白銀爲條，瑪瑙爲葉，紫金爲實。或有寶樹，碑磲爲本，

紫金爲莖，白銀爲枝，瑠璃爲條，水精爲葉，珊瑚爲華，瑪瑙爲實。行行相值，莖莖相望，枝枝相準，葉葉相向，華華相順，實實相當，榮色光耀，不可勝視，清風實發，出五音聲，微妙宮商，自然相和。又無量壽佛，其道場樹，高四百萬里，其本周圍五千由旬，枝葉四布二十萬里，一切衆寶自然合成，以月光摩尼持海輪寶，衆寶之王而莊嚴之，周帀條間垂寶瓔珞，百千萬色種種異變，無量光炎照耀無極，珍妙寶網羅覆其上，一切莊嚴隨應而現，微風徐動，吹諸寶樹，演出無量妙法音聲。其聲流布，徧諸佛國。聞其音者，得深法忍，住不退轉，至成佛道，耳根清徹，不遭苦患，目覩其色，耳聞其音，鼻知其香，舌嘗其味，身觸其光，心以法緣，皆得甚深法忍，住不退轉，至成佛道，六根清徹，無諸惱患，阿難，若彼國土天人，見此樹者，得三法忍，一者音響忍，二者柔順忍，三者無生法忍，此皆無量壽佛威神力故，本願力故，滿足願故，明了願故，堅固願故，究竟願故，佛告阿難，世間帝王，有百千音樂，自轉輪聖王，乃至第六天上，伎樂音聲，展轉相勝千億萬倍，第六天上萬種樂音，不如無量壽國諸七寶樹一種音聲千億倍也。亦有自然萬種伎樂，又其樂聲，無非法音，清暢哀亮，微妙和雅，十方世界音聲之中，最爲第一。其講堂精舍宮殿樓觀，皆七寶莊嚴自然化成，復以眞珠明月摩尼衆寶以爲交絡，覆蓋其上。內外左右有諸浴池，或十由旬，或二十三十，乃至百千由旬，縱廣深淺，皆各一等，八功德水湛然盈滿，清淨香潔，味如甘露，黃金池者，底白銀沙，白銀池者，底黃金沙，水精池者，底瑠璃沙，瑠璃池者，底水精沙，珊瑚池者，底琥珀沙，琥

珀池者，底珊瑚沙，碑磈池者，底瑪瑙沙，瑪瑙池者，底碑磈沙，白玉池者，底紫金沙，紫金池者，底白玉沙，或有二寶三寶，乃至七寶，轉共合成。其池岸上有栴檀樹，華葉垂布，香氣普熏，天優鉢羅華，鉢曇摩華，拘牟頭華，分陀利華，雜色光茂，彌覆水上，彼諸菩薩及聲聞衆，若入寶池，意欲令水沒足，水卽沒足，欲令至膝，卽至於膝，欲令至腰，水卽至腰，欲令至頸，水卽至頸，欲令灌身，自然灌身，欲令還復，水輒還復，調和冷暖自然隨意，開神悅體，蕩除心垢，清明澄潔，淨若無形，寶沙映徹，無深不照，微瀾廻流，轉相灌注，安詳徐逝不遲不疾，波揚無量自然妙聲，隨其所應，莫不聞者，或聞佛聲，或聞法聲，或聞僧聲，或寂靜聲，空無我聲，大慈悲聲，波羅密聲，或十力無畏不共法聲，諸通慧聲，無所作聲，不起滅聲，無生忍聲，乃至甘露灌頂衆妙法聲，如是等聲，稱其所聞，歡喜無量，隨順清淨離欲寂滅真實之義，隨順三寶力無所畏，不共之法，隨順通慧菩薩聲聞所行之道，無有三途苦難之名，但有自然快樂之音，是故其國名曰安樂。

本節文明法藏所成之國土，色相法音二嚴，下文明人民殊勝。從「又其國土七寶諸樹下至千億倍也」：泛明寶樹及雜寶樹，「道場樹」：卽菩提樹，樹下有成佛金剛座。「五音」：宮商角徵羽等五種音。「深法忍」：甚深之法忍，忍有三忍五忍十忍深淺不同。「心以法緣」：心與無生法相應，其念不退，卽別地圓住無生法忍也。「音響忍」：由音響悟解真理。「柔順忍」：心柔智順堪住實相。「無生忍」：證無生之實性離諸相。「本願」：彌陀總願。「滿足願」：願心圓滿。「明了願」：求心顯著。「堅固願」：緣不能壞。「究竟願」：終成不退。「轉輪聖王」：此王身具三十二相，能飛行空中，又曰飛行皇帝，增劫時人壽兩萬歲以上出世，減劫時人壽至八萬歲時始

出，有金銀銅鐵四種，次第領四三二一大洲。從「亦有自然下至最爲第一」；明伎樂。從「其講堂下至覆蓋其上」：明講堂。「精舍」：寺院之異名，爲精修者所居，此名起自祇園精舍，智論三曰，佛世時有五精舍，一、給孤獨園在舍衛國。二、鷲嶺在摩揭陀國。三、彌猴池在毘耶離國。四、菴羅樹園在毘耶離國。五、竹林精舍又名迦蘭陀竹園在摩揭陀國王舍城傍。從「內外左右下至名曰極樂」：明池相。「皆各一等」：高廣相等。「八功德水」：澄淨、清冷、甘美、輕軟、潤澤、安和，飲時除饑渴，飲已長善根。「天優鉢羅華」：青蓮華。「鉢曇摩」：紅蓮花。「拘牟頭」：蓮花之未敷者，黃色蓮華，印度蓮華有青黃赤白四種。「分陀利」：白蓮華。「十力」：如來之十力——一、知是處非處智力，二、知三世業報智力，三、知諸禪解脫三昧智力，四、知諸根勝劣智力，五、知種種解智力，六、知種種界智力，七、知一切至處道智力，八、知天眼無礙智力，九、知宿命無漏智力，十、知永斷習氣智力。「四無畏」：一切智無所畏，漏盡無所畏，說障道無所畏，說盡苦道無所畏。「十八不共法」：佛法不與二乘菩薩共，一、身無失，二、口無失，三、念無失，四、無異想，五、無不定心，六、無不知已捨，七、欲無滅（度生無厭），八、精進無滅，九、念無滅，十、慧無滅，十一、解脫無滅，十二、解脫知見無滅，十三、一切身業隨智慧行，十五、一切意業隨智慧行，十六、智慧知過去世無碍，十七、智慧知未來世無碍，十八、智慧知現在世無礙。「諸通慧聲」：神通與智慧。「無所作聲」：無實因所作。「不起滅聲」：無實果起滅。「無生忍聲」：境智相冥無生法忍。「甘露灌頂衆妙法聲」：授佛記。「隨順清淨離欲寂滅真實之義」：順涅槃果。「隨順三寶力無畏不共之法」：順菩提果。「隨順通慧菩薩聲聞所行之道」：隨順其因。

阿難彼佛國土諸往生者，具足如是清淨色身，諸妙音聲，神通功德。所處宮殿，衣服飲食，衆妙華香莊嚴之具，猶第六天自然之物，若欲食時，七寶鉢器自然在前，金銀瑠璃碑磔瑪瑙珊瑚琥珀明月眞珠如是諸鉢，隨意而至，百味飲食，自然盈滿，雖有此食，

實無食者，但見色聞香，意以爲食，自然飽足，身心柔軟，無所味著，事已化去，時至復現，彼佛國土，清淨安隱，微妙快樂，次於無爲泥洹之道。其諸聲聞菩薩天人，智慧高明，神通洞達，咸同一類，形無異狀，但因順餘方，故有天人之名，顏貌端正，超世希有，容色微妙，非天非人，皆受自然虛無之身，無極之體。佛告阿難，譬如世間貧窮乞人在帝王邊，形貌容狀寧可類乎，阿難白佛，假令此人在帝王邊，羸陋醜惡無以爲喻，百千萬億不可計倍，所以然者，貧窮乞人，底極斯下，衣不蔽形，食趣支命，饑寒困苦，人理殆盡，皆坐前世不植德本，積財不施，富有益慳，但欲唐得，貪求無厭，不信修善，犯惡山積，如是壽終，財寶消散，苦身積聚，爲之憂惱，於己無益，徒爲他有，無善可怙，無德可恃，是故死墮惡趣，受此長苦，罪畢得出，生爲下賤，愚鄙斯極，示同人類，所以世間帝王人中獨尊，皆由宿世積德所致，慈惠博施，仁愛兼濟，履信修善，無所違諍，是以壽終福應，得升善道，上生天上，享茲福樂，積善餘慶，今得爲人，乃生王家，自然尊貴，儀容端正，衆所敬事，妙衣珍饈，隨心服御，宿福所追，故能致此。佛告阿難，汝言是也，計如帝王，雖人中尊貴，形色端正，比之轉輪聖王，甚爲鄙陋，猶彼乞人在帝王邊也，轉輪聖王，威相殊妙，天下第一，比之忉利天王，又復醜惡，不得相喻，萬億倍也，假令天帝比第六天王，百千億倍不相類也，設第六天王，比無量壽佛國菩薩聲聞，光顏容色不相及逮，百千萬億不可計倍。佛告阿難，無量壽國，其諸天人，衣服飲食，華香瓔珞，繒蓋幢幡，微妙音聲，所居舍宅宮殿樓閣，稱其形色高下

大小，或一寶二寶乃至無量衆寶，隨意所欲，應念卽至，又以衆妙寶衣，徧布其地，一切天人踐之而行，無量寶網彌覆佛土，皆以金鏤眞珠，百千雜寶，奇妙珍異，莊嚴校飾，周匝四面，垂以寶鈴，光色晃耀，盡極嚴麗，自然德風，徐起微動，其風調和，不寒不暑，溫涼柔軟，不遲不疾，吹諸羅網及衆寶樹，演發無量微妙法音，流布萬種溫雅德香，其有聞者，塵勞垢習自然不起，風觸其身，皆得快樂，譬如比丘得滅盡三昧，又風吹散華，徧滿佛土，隨色次第而不雜亂，柔軟光澤，馨香芬烈，足履其上，蹈下四寸，隨舉足已，還復如故，華用已訖，地輒開裂，以次化沒，清淨無遺，隨其時節，風吹散華，如是六反，又衆寶蓮華，周滿世界，一一寶華，百千億葉，其華光明，無量種色，青色青光，白色白光，玄黃朱紫，光色赫然，煒燁煥爛，明曜日月，一一華中，出三十六百千億光，一一光中，出三十六百千億佛，身色紫金，相好殊特，一一諸佛，又放百千光明，普爲十方說微妙法，如是諸佛，各各安立，無量衆生於佛正道。

本節文明法藏所成就之國土中人民殊勝。從「阿難彼佛國土下，至神通功德」：明新往者正報殊勝，「清淨色身」，明身勝。「諸妙音聲」，明口勝。「神通功德」，明意勝。從「所處宮殿下至無爲泥洹之道」：明依報殊勝。「鉢」：梵語鉢多羅，此云應量器，比丘之飯器，有瓦、鐵兩種，用鳩鴿孔雀色，量分上中下，準唐斗，上鉢一斗，中鉢七升半，下鉢五升。「泥洹」：卽涅槃。從「諸聲聞菩薩下至不可計倍」：明舊住者正報殊勝。「智慧高明神通洞達」：顯德勝。「咸同一類」：明身勝。「虛無之身」：色如光影。「無極之體」：神通無所不至。「底」：最也。「廝」：陋也。「坐」：罪也。文中「乞人」「帝王」「輪王」「忉利王」「他化王」「無量壽佛國菩薩聲聞」，展轉校量顯勝。從「佛告阿難下至於佛正道」：重明

依報殊勝。「滅盡三昧」：又曰滅盡定，又名滅受想定，不還果以上聖人，入涅槃想，最長七日，滅盡六識心心所之禪定。「六反」：一日一夜。「燁燁燁燁」：光盛煥發燦爛。「燁」：同燁字。音葉，光盛也。上卷終。

佛告阿難，其有衆生生彼國者，皆悉住於正定之聚，所以者何，彼佛國中，無諸邪聚，及不定聚。十方恒沙諸佛如來，皆共讚歎無量壽佛威神功德不可思議，諸有衆生聞其名號，信心歡喜，乃至一念至心迴向，願生彼國，即得往生，住不退轉，唯除五逆誹謗正法。佛告阿難，十方世界諸天人民，其有志心願生彼國，凡有三輩。其上輩者，捨家棄欲而作沙門，發菩提心，一向專念無量壽佛，修諸功德，願生彼國，此等衆生臨壽終時，無量壽佛與諸大衆現其人前，即隨彼佛往生其國，便於七寶華中自然化生，住不退轉，智慧勇猛，神通自在，是故阿難，其有衆生欲於今世見無量壽佛，應發無上菩提之心，修行功德，願生彼國。佛告阿難，其中輩者，十方世界諸天人民，其有至心願生彼國，雖不能行作沙門，大修功德，當發無上菩提之心，一向專念無量壽佛，多少修善，奉持齋戒，起立塔像，飯食沙門，懸繒然燈，散華燒香，以此迴向，願生彼國，其人臨終，無量壽佛化現其身，光明相好具如眞佛，與諸大衆現其人前，即隨化佛往生其國，住不退轉，功德智慧，次如上輩者也。佛告阿難，其下輩者，十方世界諸天人民，其有志心欲生彼國，假使不能作諸功德，當發無上菩提之心，一向專意，乃至十念，念無量壽佛，願生其國，若聞深法，歡喜信樂，不生疑惑，乃至一念，念於彼佛，以至誠心願生其國，此人臨終，夢見彼佛，亦得往生，功德智慧次如中輩者也。佛告阿難無量壽佛威神無極，十方世界無量無邊不可思議諸佛如

來，莫不稱歎，於彼東方恒沙佛國，無量無數諸菩薩衆，皆悉往詣無量壽佛所，恭敬供養，及諸菩薩聲聞之衆，聽受經法，宣布道化，南西北方四維上下亦復知是。

本節文攝衆現三輩往生。「正定聚，邪定聚，不定聚」：此三聚該收一切衆生，攝大小乘，解見前四十八願文。「不退轉」：解見前四十八願文。「唯除五逆誹謗正法」：立邪毀正名謗法，觀經五逆許往生，一經名異義同，觀經約久發大乘心，遇緣造逆，事後能悔，能滅衆罪，如阿闍世王，故得往生，此經約先不發大心，現造逆罪，又無重悔，又不決定，發菩提心，故不生。又觀經前十三觀名定善，三福（世福、戒福、行福）九品名散善，深觀佛德，除滅衆罪，雖造逆罪，則得往生，此經不能修習觀佛三昧，雖作餘善不能往生。「三輩」：卽上中下三品，細分爲九，上上、上中、上下、中上、中中、中下，下上、下中、下下。智者大師觀經疏云：『上位當道種（別教十向伏無明行不退），中品當性種（別教十行，斷界外塵沙），下品當習種（別教十住，位不退）。』疏又云：『上品之人始從習種終至解行菩薩（別教三賢），中品者外凡十信以下，下品卽今時悠悠凡夫（名字位）。』疏明別教相似三賢爲上三品，觀行十信爲中三品，名字全未伏惑當下三品。上輩往生得無生忍，爲別地圓住位。「沙門」：釋子通稱，勤修戒定慧息滅貪瞋癡。「菩提心」：上求佛道下化衆生，覺道之心。文中「捨家棄欲而作沙門」、「發菩提心」、「一向專念無量壽佛」、「修諸功德」、「願生彼國」、爲上輩生者行因。「發菩提心」、「一向專念無量壽佛」、「多少修善」、「迴向願生」爲中輩生者行因。「當發無上菩提之心」、「一向專意乃至十念念無量壽佛」、「願生其國」、「聞深法歡喜信樂不生疑惑」，爲下輩生者行因。據十六觀經說：上品見佛聞法卽得無生法忍，上中品經一小劫始得無生忍，上下品經三小劫住歡喜地，中上品，應時卽得阿羅漢，中品經半劫成阿羅漢，中下品過一小劫成阿羅漢，下上品經十小劫入初地，下中品六劫蓮華乃開，下下品十二大劫蓮華乃開。「恒沙」：恒河之沙細，譬數多，恒河是佛生處、遊行處、弟子現見，故以爲喻，長阿含云：阿耨達

池，東有恒伽河（玄奘記號伽）入東海，南有新頭河（玄奘記信度）入南海。印度有三大水，西曰印度河，東曰蒲蘭達江，而恒河橫貫其中。從「佛告阿難無量壽佛威神無極下至亦復如是」：明攝上人同往。先諸佛同嘆，於彼東方下菩薩共往。

爾時世尊而說頌曰，東方諸佛國，其數如恒沙，彼土菩薩衆，往觀無量覺。南西北四維，上下亦復然，彼土菩薩衆，往觀無量覺。一切諸菩薩，各齎天妙華，寶香無價衣，供養無量覺。咸然奏天樂，暢發和雅音，歌歎最勝尊，供養無量覺。究達神通慧，遊入深法門，具足功德藏，妙智無等倫。慧日朗世間，消除生死雲，恭敬遶三帀，稽首無上尊。見彼嚴淨土，微妙難思議，因發無量心，願我國亦然。應時無量尊，動容發欣笑，口出無數光，徧照十方國。迴光圍遶身，三帀從頂入，一切天人衆，踴躍皆歡喜。大士觀世音，整服稽首問，白佛何緣笑，唯然願說意。梵聲猶雷震，八音暢妙響，當授菩薩記，今說仁諦聽，十方來正士，吾悉知彼願，志求嚴淨土，受決當作佛。覺了一切法，猶如夢幻響，滿足諸妙願，必成如是剎。知法如電影，究竟菩薩道，具諸功德本，受決當作佛。通達諸法性，一切空無我，專求淨佛土，必成如是剎。諸佛告菩薩，令觀安養佛，聞法樂受行，疾得清淨處。至彼嚴淨國，便速得神通，必於無量尊，受記成等覺。其佛本願力，聞名欲往生，皆悉到彼國，自致不退轉。菩薩興志願，願己國無異，普念度一切，名顯滿十方。奉事億如來，飛化徧諸剎，恭敬歡喜心，還到安養國。若人無善本，不得聞此經，清淨有戒者，乃獲聞正法。曾更見世尊，則能信此事，謙敬聞奉行，踴躍大歡喜。憍慢懈怠怠，難以信此法，宿世見諸佛，樂聽如是教。

聲聞或菩薩，莫能究聖心，譬如從生盲，欲行開導人。如來智慧海，深廣無涯底，二乘非所測，惟佛獨明了。假使一切人，具足皆得道，淨慧知本空，億劫思佛智，窮力極講說，盡壽猶不知，佛慧無邊際，如是致清淨。壽命甚難得，佛世亦難值，人有信慧難，若聞精進求，聞法能不忘，見敬得大慶，則我善親友，是故當發意。設滿世界火，必過要聞法，會當成佛道，廣度生死流。

本節文共有三十偈，前十五偈，頌前長文後段，菩薩共往。後十五偈，頌前長文初段，諸佛同嘆。「齎」：音基，送也。文初四句偈，頌前長行「於彼東方恒沙佛國無量無數諸菩薩衆皆悉往詣無量壽佛所」。第二四句偈，頌前長行「南西北方四維上下亦復如是」。「無量覺」：無量壽佛。第三四五六偈，頌前長行文「恭敬供養」。「華」、「香」、「衣」、「樂」、「供養」，並歌歎佛德，「究達神通慧至消除生死雲」有一偈半是口供養。「恭敬遶三市稽首無上尊」是身供養。「究達神通慧」：嘆佛神通智慧，智是通本，通爲智用。「游入深法門」：觀照曰游，窮本曰入，福是慧資，慧爲福導，雙嘆福慧二門。「慧日」：智慧如日普照。「生死雲」：生死無實性。第七偈，見土願求。「應時無量尊至必成如是剎」：有八偈，頌前長行文「聽受經法宣播道化」。初二偈彌陀現相，第三偈，觀音請問，後五偈，彼佛具答。「八音」：如來所得八種之音聲，一極好音、二柔輭音、三和適音、四尊慧音、五不女音、六不誤音、七深遠音、八不竭音。「正士」：梵語菩薩，求正道之大士。「授決」：同授記，授與決定作佛之記。「覺了一切法猶如夢幻響」：是世諦智。「通達諸法性一切空無我」：是出世智。「諸佛告菩薩至廣度生死流」：有十五偈，前五偈，頌前長行文，「十方世界無量無邊不可思議諸佛如來莫不稱嘆」，諸佛同歎，後十偈，頌前長行文「佛告阿難，無量壽佛威神無極」，釋迦自歎。「淨慧知本空」：空慧。「壽命」、「佛世」、「信慧」，三難已得，當聞經勤求。「設滿世界火必過要聞法」：爲聞法，火海也要衝過。「清淨有戒者」：戒急。「必過要聞法」：乘急。「生盲」：生而即盲之人，所謂日光不照生盲，河水難消渴鬼。

佛告阿難，彼國菩薩，皆當究竟一生補處，除其本願爲衆生故，以弘誓功德而自莊嚴，普欲度脫一切衆生。阿難彼佛國中諸聲聞衆身光一尋，菩薩光明照百由旬，有二菩薩最尊第一，威神光明普照三千大千世界，阿難白佛，彼二菩薩其號云何，佛言，一名觀世音，二名大勢至，此二菩薩，於此國土修菩薩行，命終轉化，生彼佛國。阿難，其有衆生生彼國者，皆悉具足三十二相。智慧成滿，深入諸法，究暢要妙，神通無碍，諸根明利，其鈍根者，成就二忍，其利根者，得不可計無生法忍。又彼菩薩，乃至成佛，不受惡趣，神通自在，常識宿命，除生他方五濁惡世，示現同彼，如我國也。佛語阿難，彼國菩薩承佛威神，一食之頃，往詣十方無量世界，恭敬供養諸佛世尊，隨心所念，華香伎樂，繒蓋幢幡，無數無量供養之具，自然化生，應念卽至，珍妙殊特，非世所有，輒以奉散諸佛及菩薩聲聞大衆，在虛空中化成華蓋，光色昱爍，香氣普熏，其華周圓四百里者，如是轉倍，乃覆三千大千世界，隨其前後，以次化沒，其餘菩薩僉然欣悅，於虛空中共奏天樂，以微妙音歌歎佛德，聽受經法，歡喜無量，供養佛已，未食之前，忽然輕舉還至本國。佛語阿難，無量壽佛，爲諸聲聞菩薩天人頒宣法時，都悉集會七寶講堂，廣宣道教，演暢妙法，莫不歡喜心解得道，卽時四方自然風起，吹七寶樹出五音聲，無量妙華隨風四散，自然供養如是不絕，一切諸天皆齎天上百千華香，萬種伎樂，供養其佛及諸菩薩聲聞之衆，普散華香，奏諸音樂，前後來往，更相開避，當斯之時，熙怡快樂，不可勝言。

本節文舉無量壽國，壽長、光勝、具相、智深、離惡、興供、聞法不絕

等勝妙之事。「一尋」：尺度名，八尺曰尋。「三千大千世界」：俱舍論十一曰：『千四大洲，乃至梵世，如是總說，爲一小千，千倍小千，名一中千界，千中千界，總名一大千，如是大千同成同壞。』含小中大三種千，爲三千界，是一佛所化之境。智論七曰：『此三千大千世界之廣恰等於第四禪天成壞必同時。』「三十二相」：具此相者在家爲輪王，出家成正覺。法華經方便品云：『彩畫作佛像，百福莊嚴相。』智論曰：「在人道中閻浮提男子身遇佛出世而種。詳如三藏法數。「二忍」：音響忍柔順忍。「五濁惡世」：劫濁見濁煩惱濁衆生濁命濁。「昱」音玉，日光閃爍。「僉」：音千，衆人也。

佛語阿難，生彼佛國諸菩薩等，所可講說，常宣正法，隨順智慧，無違無失，於其國土所有萬物，無我所心，無染著心，去來進止，情無所係，隨意自在，無所適莫，無彼無我，無競無訟，於諸衆生，得大慈悲饒益之心，柔潤調伏，無忿恨心，離蓋清淨，無厭怠心，等心勝心深心定心，愛法樂法喜法之心，滅諸煩惱離惡趣心，究竟一切菩薩所行。具足成就無量功德，得深禪定，諸通明慧，遊志七覺，修心佛法，肉眼清澈靡不分了，天眼通達，無量無限，法眼觀察究竟諸道，慧眼見真能度彼岸，佛眼具足覺了法性，以無礙智爲人演說。等觀三界空無所有，志求佛法，具諸辯才，除滅衆生煩惱之患，從如來生，解法如如，善知集滅、音聲方便、不欣世語、樂在正論、修諸善本、志崇佛道、知一切法、皆悉寂滅，生身煩惱，二餘俱盡，聞甚深法，心不疑懼，常能修行，其大悲者，深遠微妙，靡不覆載。究竟一乘，至於彼岸，決斷疑網，慧由心出，於佛教法，該羅無外，智慧如大海，三昧如山王，慧光明淨，超踰日月，清白之法，具足圓滿，猶如雪山，照諸功德等一淨故。猶如大地，淨穢好惡無異心故。猶如淨水，

洗除塵勞諸垢染故。猶如火王，燒滅一切煩惱薪故。猶如大風，行諸世界無障礙故。猶如虛空，於一切有無所著故。猶如蓮華，於諸世間無染汙故。猶如大乘，運載羣萌出生死故。猶如重雲，震大法雷覺未覺故。猶如大雨，雨甘露法潤衆生故。如金剛山，衆魔外道不能動故。如梵天王，於諸善法最上首故。如尼拘類樹，普覆一切故。如優曇鉢華，希有難遇故。如金翅鳥，威服外道故。如衆遊禽，無所藏積故。猶如牛王，無能勝故。猶如象王，善調伏故。如師子王，無所畏故。曠若虛空，大慈等故。摧滅嫉心，不忌勝故，專樂求法，心無厭足，常欲廣說，志無疲倦，擊法鼓，建法幢，曜慧日，除癡闇，修六和敬，常行法施，志勇精進，心不退弱，爲世燈明，最勝福田，常爲師導，等無憎愛，唯樂正道，無餘欣戚，拔諸欲刺，以安羣生，功德殊勝，莫不尊敬，滅三垢障，遊諸神通。因力緣力意力願力方便之力，常力善力定力慧力多聞之力，施戒忍辱精進禪定智慧之力，正念止觀諸通明力，如法調伏諸衆生力，如是等力，一切具足。身色相好，功德辯才，具足莊嚴，無與等者，恭敬供養無量諸佛，常爲諸佛所共稱歎，究竟菩薩諸波羅密，修空無相無願三昧，不生不滅諸三昧門，遠離聲聞緣覺之地。阿難，彼諸菩薩成就如是無量功德，我但爲汝略言之耳，若廣說者，百千萬劫不能窮盡。

本節文彰顯無量壽國菩薩德行圓滿。從「佛告阿難下至究竟一切菩薩所行」：明修六度離諸過患。「無我所心」：離見。「無染著心」：捨愛。

「去來進止情無所係隨意自在」：離身過。「無所適莫（適親莫疎）無彼無我」：離意過。「無競無訟」：離口過。攝身口意不犯戒也。「無忿恨心」：離忍障。「離蓋清淨」：貪、瞋、睡、掉、悔、疑、蓋覆善心，令不增長，

離則清淨。「無厭怠心」：精進。「等心」：諸行齊修。「勝心」：所修務上。「深心」：求心深入。「定心」：禪心離念。「愛法」：難遇想。「樂法」：不疲倦。「喜法之心」：慧與心期。「滅諸煩惱」：離惑。「離惡趣心」：除業。從「具足成就無量功德下至爲人演說」：明具德說法。「深禪定」：世間禪有根本味禪四禪四空等，根本淨禪有六妙門，十六特勝、通明，出世禪有觀禪（九想八背十一切處）、練禪（九次第定）、熏禪（獅子奮迅三昧）、修禪（超越三昧）、出世上上禪（九種大禪）、又有五門禪（數息、不淨、慈心、因緣、念佛）詳如止觀。「諸通」：天眼、天耳、他心、神足、宿命、漏盡六通。「明」：天眼、宿命、漏盡三明。「慧」：聞思修三慧。「七覺」：念、慧、精進、輕安、喜、定、捨。「修心佛法」：上求。「以無礙智爲人演說」：下化。「肉眼清徹下至佛眼具足覺了法性」：明五眼功能。所謂『天眼通非礙，肉眼礙非通，法眼唯觀俗，慧眼了真空，佛眼如千日，照異體還同。』法華玄義卷二：『大經云，學大乘者，雖有肉眼名爲佛眼。』又云，殃掘云：『所謂彼眼根，於諸如來常，具足無減修，了了分明見。』均說明肉眼具餘限，況六根以心爲主。從「等觀三界空無所有下至靡不覆載」：明二利具足。「等觀三界空無所有」：能觀空始平等，所謂不如三界見於三界。「從如來生解法如如」：從佛口出，從法化生，故解諸法空同一如。「善知習滅音聲方便」：研教曰習聲，除惡曰滅聲，權說曰方便，以寂滅無聲字。「生身煩惱二餘俱盡」：煩惱惑因，生身苦果。「聞甚深法心不疑懼」：心柔智順堪住實相。聞深能解，聞大能入。「其大悲者」：下化。「靡不覆載」：悲心廣大。從「究竟一乘至於彼岸下至大慈等故」：明白利利他二德殊勝。「究竟一乘」：權說分三，實說唯一。「大乘」：三車取大白牛車。「燒滅一切煩惱薪」：大論明三處焦柱，通乾慧（圓別人通菩薩位）別初地圓初住。「雨甘露法潤衆生」：注一雨潤三草二木（小草人天、中草二乘、上草藏菩薩、小樹通三乘、大樹別教）。「尼拘類樹」：此云無節，或云縱廣，去地三丈方有枝葉，有說榕樹有說柳樹，有華，唐地無此樹。「優曇鉢華」：此云靈瑞，或瑞應，三千年一現。「金翅鳥」：梵語迦樓羅，八部衆之一，翅金色，兩翅廣三百六萬里，住於

須彌山下層，常取龍爲食。「牛王」：牛中勝者，歎菩薩德無能勝故。「象王」：餘經譬佛，此處喻菩薩。「師子王」：譬佛菩薩一切無畏。從「摧滅嫉心下至遊諸神通」：明修增進。「摧滅嫉心不忌勝故」：嫉妒之心爲利他之障，故須摧滅，廣說不倦，故不忌勝。「擊法鼓」：教聲遠被。本經上卷有『扣法鼓，吹法螺』句。「建法幢」：妙法高聳，如幢之上出。本經上卷有『建法幢震法雷』句。「曜慧日」：佛智能照世之盲冥。普門品云：『慧日破諸闇，能伏災風火。』前偈文云『慧日照世間，清除生死云。』「修六和敬」：身和同住，口和無諍，意和同悅，戒和同修，見和同解，利和同均。「福田」：三寶爲世種福之田，梯田的袈裟曰福田衣。「師導」：卽導師。從「因力緣力意力願力方便力下至一切具足」：明自他二利具足。「諸通明力」：三明六通。「如法調伏衆生之力」：利他之力。柔者以法調之，剛者以力伏之。從「身色相好下至遠離聲聞緣覺之地」：總歎菩薩德。文分自德殊勝，諸佛共歎，究竟大乘，遠離小乘，文顯可知。前文廣舉無量壽國勝妙之事，令人願求，下文勸人往生。

佛告彌勒菩薩諸天人等，無量壽國，聲聞菩薩功德智慧，不可稱說，又其國土微妙安樂清淨若此，何不力爲善，念道之自然著於無上下，洞達無邊際，宜各勤精進，努力自求之，必得超絕去，往生安樂國，橫截五惡道，惡道自然閉，昇道無窮極，易往而無人，其國不逆違，自然之所牽，何不棄世事，勤行求道德，可得極長生，壽樂無有極。

本節文勸人往生。「彌勒」：菩薩姓，譯慈氏，名阿逸多譯無能勝，或言阿逸多爲姓，彌勒爲名，生南天竺婆羅門家，紹釋迦佛位爲補處大士，先佛入滅，生兜率內院，經四千歲（卽人中五十六億七千萬年）下生人間，於華林園龍華樹下成正覺。「念道之自然著於無上下」：念佛自然往生，證著不簡貴賤上下。「洞達無邊際」：洞達是智，無邊際是境。「橫截五惡道」：橫出三界，修羅含五道中。「昇道無窮極」：彌陀時時垂手。「易往而無

人」：念佛容易，一心難，念念分明，心心絕待，三福齊修，專心繫念，發菩提心，迴向願求，若不修因，生者不易。「其國不逆違自然之所牽」：修因感果易往，曰不逆違，爲業習牽縛，顯前無人。

然世人薄俗，共諍不急之事，於此劇惡極苦之中，勤身營務，以自給濟，無尊無卑，無貧無富，少長男女，共憂錢財，有無同然，憂思適等，屏營愁苦，累念積慮，爲心走使，無有安時，有田憂田，有宅憂宅，牛馬六畜，奴婢錢財，衣食什物，復共憂之，重思累息，憂念愁怖，橫爲非常水火盜賊，怨家債主，焚漂劫奪，消散磨滅，憂毒忪忪，無有解時，結憤心中，不離憂惱，心堅意固，適無縱捨，或坐摧碎，身亡命終，棄捐之去，莫誰隨者，尊貴豪富，亦有斯患，憂懼萬端，勤苦若此，結衆寒熱，與痛共居，貧窮下劣困乏常無，無田亦憂欲有田，無宅亦憂欲有宅，無牛馬六畜奴婢錢財衣食什物，亦憂欲有之，適有一，復少一，有是少是，思有齊等，適欲具有，便復糜散，如是憂苦，當復求索，不能時得，思想無益，身心俱勞，坐起不安，憂念相隨，勤苦若此，亦結衆寒熱，與痛共居，或時坐之終身夭命，不肯爲善行道進德，壽終身死，當獨遠去，有所趣向，善惡之道，莫能知者。

娑婆濁惡使人厭捨。本節文明貪，通就世人明貪，尊貴明貪，貧窮明貪。「忪」：音中。文顯可知。

世間人民，父子兄弟，夫婦家室，中外親屬，當相敬愛，無相憎嫉，有無相通，無得貪惜，言色常和，莫相違戾，或時心諍，有所悲怒，今世恨意，微相憎嫉，後世轉劇，至成大怨，所以者何，世間之事，更相患害，雖不卽時，應急相破，然含毒畜怒，結憤

精神，自然剋識，不得相離，皆當對生，更相報復，人在世間愛欲之中，獨生獨死，獨去獨來，當行至趣，苦樂之地，身自當之，無有代者，善惡變化，殃福異處，宿豫嚴待，當獨趣入，遠到他所，莫能見者，善惡自然，追行所生，竊竊冥冥，別離久長，道路不同，會見無期，甚難甚難復得相值，何不棄衆事，各遇強健時，努力勤修善，精進願度世，可得極長生，如何不求道，安所須待，欲何樂乎。

本節文明瞋過。第一段以理相勸，「或時心諍」下，明瞋恚爲過，首明未來怨害相報。「人在世間愛欲之中」下，明未來惡道之苦。「所生竊竊」下，明別離難聚。「何不棄衆事」下，勸修捨離。「應急相破」：怨宜解，不宜結。「結憤精神自然剋識」：由前結恨成怨，種子引果，不假功用。

「宿豫嚴待」：宿造善惡業，苦樂報嚴待，因果不差絲毫。「竊竊冥冥」：中有身狀。「竊」：音邀。

如是世人，不信作善得善，爲道得道，不信人死更生，惠施得福，善惡之事，都不信之，謂之不然，終無有是，但坐此故，且自見之，更相瞻視，先後同然，轉相承受，父餘教令，先人祖父，素不爲善，不識道德，身愚神闇，心塞意閉，死生之趣，善惡之道，自不能見，無有語者，吉凶禍福，競各作之，無一怪也。生死常道，轉向嗣立，或父哭子，或子哭父，兄弟夫婦，更相哭泣，顛倒上下，無常根本，皆當過去，不可常保，教語開導，信之者少，是以生死流轉，無有休止，如此之人，蒙冥抵突，不信經法，心無遠慮，各欲快意，癡惑愛欲，不達於道德，迷沒於瞋怒，貪狼於財色，坐之不得道，當更惡趣苦，生死無窮已，哀哉甚可傷，或時室家父子兄弟夫婦，一死一生，更相哀愍，恩愛思慕，憂念

結縛，心意痛著，迭相顧戀，窮日卒歲，無有解已，教語道德，心不開明，思想恩好，不離情欲，昏蒙暗塞，愚惑所覆，不能深思熟計，心自端正，專精行道，決斷世事，便旋至竟，年壽終盡，不能得道，無可奈何，總猥憤擾，皆貪愛欲，惑道者衆，悟之者少，世間匆匆，無可聊賴，尊卑上下，貧富貴賤，勤苦匆務，各懷殺毒，惡氣窳冥，爲妄興事，違逆天地，不從人心，自然非惡，先隨與之，恣聽所爲，待其罪極，其壽未終盡，便頓奪之，下入惡道，累世勤苦，展轉其中，數千億劫，無有出期，痛不可言，甚可哀愍。

本節文明癡過。從「如是世人下至無一怪也」，明世人愚癡。從「生死常道轉相嗣立至甚可哀愍」，正明癡過。「都不信之」：顯癡之由來，人無正信，且執「自見」。「更相瞻視先後同然」：效習他人。「轉相承受，父餘教子」：父邪子愚。「先人祖父素不爲善」：三代相傳無善行。「不識道德」：無解。「身愚神闇，心塞意閉，死生之趣，善惡之道，自不能見，無有語者」：生死大事，善惡因果，無善知識開導，凡夫難解。「吉凶禍福競各作之無一怪也」：世人每做逆因緣，認爲所宜，如欲達不知捨，欲壽不戒殺，消災反害命。「更相哭泣」：癡相。「當更惡趣苦」：由癡造業感苦。「更相哀愍」：由癡相憶。「自然非惡」：自然招集非法惡緣。「猥」音偉。

佛告彌勒菩薩，諸天人等，我今語汝，世間之事，人用是故，坐不得道，當熟思計，遠離衆惡，擇其善者，勤而行之，愛欲榮華，不可常保，皆當別離，無可樂者，遇佛在世，當勤精進，其有志願生安樂國，可得智慧明達，功德殊勝，勿得隨心所欲，虧負經戒，在人後也，儻有疑意，不解經者，可具問佛，當爲說之。彌勒菩薩長跪白言，佛威神尊重，所說快善，聽佛經語，貫心思之，

世人實爾，如佛所言，今佛慈愍，顯示大道，耳目開明，長得度脫，聞佛所說，莫不欣喜，諸天人民，蠕動之類，皆蒙慈恩，解脫憂苦，佛語教誡，甚深甚善，智慧明見八方上下去來今事，莫不究暢，今我衆等，所以蒙得度脫，皆佛前世求道之時，謙苦所致，恩德普覆，福祿巍巍，光明徹照，達空無極，開入泥洹，教授典攬，威制消化，感動十方，無窮無極，佛爲法王，尊超衆聖，普爲一切天人之師，隨心所願，皆令得道，今得值佛，復聞無量壽聲，靡不歡喜，心得開明。佛告彌勒，汝言是也，若有慈敬於佛者，實爲大善，天下久久，乃復有佛，今我於此世作佛，演說經法，宣布道教，斷諸疑網，拔愛欲之本，杜衆惡之源，遊步三界，無所罣礙，典攬智慧，衆道之要，執持綱維，昭然分明，開示五趣，度未度者，決正生死泥洹之道。彌勒當知，汝從無始劫來，修菩薩行，欲度衆生，其已久遠，從汝得道至於泥洹，不可稱數，汝及十方諸天人民一切四衆，永劫已來，展轉五道，憂畏勤苦，不可具言，乃至今世，生死不絕，與佛相值，聽受經法，又復得聞無量壽佛，快哉甚善，吾助爾喜。汝今亦可自厭生死老病痛苦，惡露不淨，無可樂者，宜自決斷，端身正行，益作諸善，修己潔淨，洗除心垢，言行忠信，表裏相應，人能自度，轉相拯濟，精門求願，積累善本，雖一世勤苦，須臾之間，後生無量壽國，快樂無極，長與道德合明，永拔生死根本，無復貪恚愚癡苦惱之患，欲壽一劫百劫千億萬劫，自在隨意皆可得之，無爲自然，次於泥洹之道。汝等宜各精進，求心所願，無得疑惑中悔，自爲

過咎，生彼邊地七寶宮殿，五百歲中受諸厄也。彌勒白言，受佛重誨，專精修學，如教奉行，不敢有疑。

本節文勸人修捨。從「佛告彌勒下至當爲說之」，正勸修捨。從「彌勒菩薩長跪白言下至心得開明」，彌勒領解。從「佛告彌勒汝言是也下至決正生死泥洹之道」，荷佛恩。從「彌勒當知下至吾助爾喜」：慶彌勒值佛。從「汝今亦可自厭生死下至次於泥洹之道」：勸修。從「汝等宜各精進下至受諸厄也」：勸捨疑。從「彌勒白言下至不敢有疑」：彌勒領行。

「人用是故」：指前貪瞋癡過。「坐」：由也。「衆惡」：貪瞋癡。

「善者」：戒定慧。「遇佛在世」：泛指正像末法。「願生安樂國」：念念分明，心心絕待繫念願求，選定人生歸宿，乃智慧所爲。「隨心所欲」：心隨境轉，識與塵合。「在人後」：指人道之後列爲三途。「世人實爾」：實爲三毒所染。「謙苦」，舉佛因。「恩德」：彰佛果。「法王」：自在。

「典攬」：經典攬衆義。「威制消化」：剛強者，以威德消伏歸於聖化。

「感動十方」：善輒者慈力攝取。「無量壽聲」：大集經明實相念佛，小本彌陀經持名念佛，觀經觀想念佛，般舟三昧經所說觀像念佛等。「天下久」：彰佛難值。「遊步三界」：身輪。「開示五趣」：口輪。「典攬智

慧」：意輪。「泥洹」：惑盡智圓，卽不生滅涅槃。「汝從無數劫來修菩薩行」：釋迦與彌勒於底沙（弗沙）佛所共修佛道，釋迦七日七夜翹一足讚底沙佛火界定曰：『天地此界多聞室，逝宮天處十方無，丈夫牛王大沙門，尋盡山林遍無等。』便超九劫於慈氏前得無上覺。「生死不絕」：彌勒補處有上士，尚有原品生相無明感變易死。「端身正行」：身淨。「言行忠信」：口淨。「洗除心垢」：意淨。「長與道德合明」：身與福俱名道德合，心與智俱名合明。「生死根本」：卽貪恚愚癡。「疑惑中悔」：疑心念佛，但信罪福，願生彼國，卽生疑城、胎宮，雖居寶殿，五百歲不見佛不聞法。

佛告彌勒，汝等能於此世，端心正意，不作衆惡，甚爲至德，十方世界最無倫匹，所以者何，諸佛國土，天人之類，自然作善，

不大爲惡，易可開化，今我於此世間作佛，處於五惡五痛五燒之中，爲最劇苦，教化羣生，令捨五惡，令去五痛，令離五燒，降化其意，令持五善，獲其福德度世長壽泥洹之道。佛言，何等五惡，何等五痛，何等五燒，何等消化五惡，令持五善，獲其福德度世長壽泥洹之道。其一惡者，諸天人民顛動之類，欲爲衆惡，莫不皆然，強者伏弱，轉相剋賊，殘害殺戮，迭相吞噬，不知修善，惡逆無道，後受殃罰，自然趣向，神明記識，犯者不赦，故有貧窮下賤，乞丐孤獨，聾盲瘖啞，愚癡弊惡，至有尪狂不逮之屬，又有尊貴豪富，高才明達，皆由宿世慈孝，修善積德所致，世有常道，王法牢獄，不肯畏慎，爲惡入罪，受其殃罰，求望解脫，難得勉出，世間有此目前現事，壽終後世，尤深尤劇，入其幽冥，轉生受身，譬如王法，痛苦極刑，故有自然三途，無量苦惱，轉貿其身，改形易道，所受壽命，或長或短，魂神精識，自然趣之，當獨值向，相從共生，更相報復，無有止已，殃惡未盡，不得相離，展轉其中，無有出期，難得解脫，痛不可言，天地之間，自然有是，雖不卽時卒暴應至，善惡之道，會當歸之，是爲一大惡一痛一燒，勤苦如是，譬如大火焚燒人身，人能於中一心制意，端身正行，獨作諸善，不爲眾惡者，身獨度脫，獲其福德度世上天泥洹之道，是爲一大善也。

本節文廣明五惡五痛五燒先舉其一。「五惡」：殺盜淫妄酒。「五痛」：造五惡生遭王法，死入地獄。「五燒」：苦痛切身喻如火燒。「五善」：卽五戒。「噬」：音誓，咬也。「尪」：音汪，行爲不正。「強者伏弱」：弱肉強食。「貧窮」「尊貴」，乃引業中的滿業，總別二報。「相從共生」：神識與形成個體活動。「是爲一大善也」：仁而不殺，感長命無病具相尊貴

等報。

佛言，其二惡者，世間人民，父子兄弟，室家夫婦，都無義理，不順法度，奢淫僞縱，各欲快意，任心自恣，更相欺惑，心口各異，言念無實，佞諂不忠，巧言諛媚，嫉賢謗善，陷入冤枉，主上不明，任用臣下，臣下自在，機僞多端，踐度能行，知其形勢，在位不正，爲其所欺，妄損忠良，不當天心，臣欺其君，子欺其父，兄弟夫婦，中外知識，更相欺誑，各懷貪欲瞋恚愚癡，欲自厚己，欲貪多有，尊卑上下，心俱同然，破家亡身，不顧前後，親屬內外，坐之滅族，或時室家知識，鄉黨市里，愚民野人，轉共從事，更相利害，忿成怨結，富有慳惜，不肯施與，愛保貪重，心勞身苦，如是至竟，無所恃怙，獨來獨去，無一隨者，善惡禍福，追命所生，或在樂處，或入苦毒，然後乃悔，當復何及，世間人民，心愚少智，見善憎謗，不思慕及，但欲爲惡，妄作非法，常懷盜心，希望他利，消散磨盡，而復求索，邪心不正，懼人有色，不豫思計，事至乃悔，今世現有王法牢獄，隨罪趣向，受其殃罰，因其前世不信道德，不修善本，今復爲惡，天神剋識，別其名籍，壽終神逝，下入惡道，故有自然三途無量苦惱，展轉其中，世世累劫，無有出期，難得解脫，痛不可言，是爲二大惡二痛二燒，勤苦如是，譬如大火焚燒人身，人能於中一心制意，端身正行，獨作諸善，不爲衆惡者，身獨度脫，獲其福德度世上天泥洹之道，是爲二大善也。

本節文明第二惡，痛苦燒身。「諛」：音餘。委曲奉承。「不思慕及」：不見賢思齊。「踐度能行」：因公濟私。「鄉黨市里」：古制一萬二千五百

家爲鄉。五百家爲黨。五家爲鄰，五鄰爲里。「是爲二大善也」：義而不盜。佛言，其三惡者，世間人民，相因寄生，共居天地之間，處年壽命無能幾何，上有賢明長者尊貴豪富，下有貧窮廝賤，尙劣愚夫，中有不善之人，常懷邪惡，但念淫泆，煩滿胸中，愛欲交亂，坐起不安，貪意守惜，但欲唐得，眄眄細色，邪態外逸，自妻厭憎，私妄出入，費損家財，事爲非法，交結聚會，興師相伐，攻劫殺戮，強奪無道，惡心在外，不自修業，盜竊趣得，欲擊成事，恐勢迫脅，歸給妻子，恣心快意，極身作樂，或於親屬，不避尊卑，家室中外，患而苦之，亦復不畏王法禁令，如是之惡，著於人鬼，日月照見，神明記識，故有自然三塗，無量苦惱，展轉其中，世世累劫，無有出期，難從解脫，痛不可言，是爲三大惡，三痛三燒，勤苦如是，譬如大火焚燒人身，人能於中一心制意，端身正行，獨作諸善，不爲衆惡者，身獨度脫，獲其福德度上天泥洹之道，是爲三大善也。

本節文明第三惡，痛苦燒身。「泆」：音亦，放肆。「胥」：同胸字。「眄眄」：上音免，下音賴。斜視。「相因寄生」：因緣相託以爲眷屬。「貪意守惜」：憐香惜玉。「欲擊成事」：擊者動也。「交結」「興師」：文騙武奪。「不自修業」：不務正業。「是爲三大善也」禮而不淫。

佛言，其四惡者，世間人民，不念修善，轉相教令，共爲衆惡，兩舌惡口，妄語綺語，讒賊鬥亂，憎嫉善人，敗壞賢明，於傍快喜，不孝二親，輕慢師長，朋友無信，難得誠實，尊貴自大，謂已有道，橫行威勢，侵易於人，不能自知，爲惡無恥，自以強健，欲人敬難，不畏天地神明日月，不肯作善，難可降化，自用偃蹇，

謂可常爾，無所憂懼，常懷憍慢，如是衆惡，天神記識，賴其前世頗多福德，小善扶接，營護助之，今世爲惡，福德盡滅，諸善鬼神，各去離之，身獨空立，無所復依，壽命終盡，諸惡所歸，自然迫促，共趣奪之，又其名籍，記在神明，殃咎牽引，當往趣向，罪報自然，無從捨離，但得前行，入於火鑊。身心摧碎，精神痛苦，當斯之時，悔復何及，天道罔然，不得蹉跌，故有自然三塗，無量苦惱，展轉其中，世世累劫，無有出期，難得解脫，痛不可言，是爲四大惡四痛四燒，勤苦如是，譬如大火焚燒人身，人能於中一心制意，端身正行，獨作諸善，不爲衆惡，身獨度脫，獲其福德度世上天泥洹之道，是爲四大善也。

本節文明第四惡，痛苦燒身，「謂已有道」：未證言證。「偃蹇」：上音掩，下音檢，困頓不得志。「無從捨離」：如影隨形。「鑊」：音惑，鍋煮。「罔」：音景，明也。「跌」：音蝶，減也。「身獨度脫」：自修自得。「是爲四大善也」：信而不妄。

佛言，其五惡者，世間人民，徙倚懈怠，不肯作善，治身修業，家室眷屬，饑寒困苦，父母教誨，瞋目怒應，言令不和，違戾反逆，譬如怨家，不如無子，取與無節，衆共患厭，負恩違義，無有報償之心，貧窮困乏，不能復得，辜較縱奪，放恣遊散，串數唐得，用自賑給，耽酒嗜美，飲食無度，肆心蕩逸，魯扈抵突，不識人情，強欲抑制，見人有善，妒嫉惡之，無義無禮，無所顧難，自用識當，不可諫曉，六親眷屬，所資有無，不能憂念，不惟父母之恩，不存師友之義，心常念惡，口常言惡，身常行惡，曾無一善，不信先聖諸佛經法，不信行道可得度世，不信死後神

明更生，不信作善得善，爲惡得惡，欲殺真人，鬥亂衆僧，欲害父母兄弟眷屬，六親憎惡，願令其死，如是世人，心意俱然，愚痴蒙昧，而自以爲智慧，不知生所從來，死所趣向，不仁不順，惡逆天地，而於其中希望僥倖，欲求長生，會當歸死，慈心教誨，令其念善，開示生死善惡之趣，自然有是，而不信之，苦心與語，無益其人，心中閉塞，意不開解，大命將終，悔懼交至，不豫修善，臨窮方悔，悔之於後，將何及乎，天地之間，五道分明，恢廓窈冥，浩浩茫茫，善惡報應，禍福相承，身自當之，無誰代者，數之自然，應其所行，殃咎追命，無得從捨，善人行善，從樂人樂，從明人明，惡人行惡，從苦人苦，從冥人冥，誰能知者，獨佛知耳，教語開示，信用者少，生死不休，惡道不絕，如是世人，難可具盡，故有自然三塗，無量苦惱，展轉其中，世世累劫，無有出期，難得解脫，痛不可言，是爲五大惡五痛五燒，勤苦如是，譬如大火焚燒人身，人能於中一心制意，端身正念，言行相副，所作至誠，所語如語，心口不轉，獨作諸善，不爲衆惡者，身獨度脫，獲其福德，度世上天，泥洹之道，是爲五大善也。

本節文明第五惡，痛苦燒身。「徒倚」：徘徊。「辜較縱奪」：負罪較著盜人財物，以爲快意。「用自賑給」：捐富補貧。「魯扈抵突」：強橫侵陵。「六親」：父母兄弟妻子。「上天」：天業福德爲淨業之因。「是爲五大善也」：智而不酒。

佛告彌勒，吾語汝等，是世五惡勤苦若此，五痛五燒，展轉相生，但作衆惡，不修善本，皆悉自然人諸惡趣，或其今世先被殃病，求死不得，求生不得，罪惡所招，示衆見之，身死隨行，入三惡

道，苦毒無量，自相焦然，至其久後，共作怨結，從小微起，遂成大惡，皆由貪著財色，不能施惠，癡欲所迫，隨心思煩惱結縛，無有解已，厚己爭利，無所省錄，富貴榮華，當時快意，不能忍辱，不務修善，威勢無幾，隨以磨滅，身坐勞苦，久後大劇，天道施張，自然糾舉，綱紀羅網，上下相應。兢兢忪忪，當入其中，古今有是，痛哉可傷，佛語彌勒，世間如是，佛皆哀之，以威神力，摧滅衆惡，悉令就善，棄捐所思，奉持經戒，受行道法，無所違失，終得渡世泥洹之道。

本節文總明五惡「自然糾（音久，同糾字）舉」：造惡必彰。「兢兢（音窮）忪忪（音中）」：罪者無伴。「經戒」：戒定。「渡世」：超過世間惡痛燒。「從小微起遂成大惡」：起殺生惡。「皆由貪著財色不能施惠」：起劫盜心。「癡欲所迫隨心思想」：起邪淫惡。「厚己諍利無所省錄」：起妄語惡。「富貴榮華當時快意」：起飲酒惡。

佛言，汝今諸天人民，及後世人，得佛經語，當熟思之，能於其中端身正行，主上爲善，率化其下，轉相敕令，各自端守，尊聖敬善，仁慈博愛，佛語教誨，無敢虧負，當求度世拔斷生死衆惡之本，永離三塗無量憂怖苦痛之道，汝等於是廣植德本，布恩施惠，勿犯道禁，忍辱精進，一心智慧，轉相教化，爲德立善，正心正意，齋戒清淨一日一夜，勝在無量壽國爲善百歲，所以者何，彼佛國土，無爲自然，皆積衆善，無毛髮之惡，於此修善十日十夜，勝於他方諸佛國中爲善千歲，所以者何，他方佛國，爲善者多，爲惡者少，福德自然，無造惡之地，唯此間多惡，無有自然，勤苦求欲，轉相欺殆，心勞形困，飲苦食毒，如是惡務，未嘗寧息，吾哀汝等天人之類，苦心誨喻，教令修善，隨宜開導，授與

經法，莫不承用，在意所願，皆令得道，佛所遊履國邑丘聚，靡不蒙化，天下和順，日月清明，風雨以時，災厲不起，國豐民安，兵戈無用，崇德興仁，務修禮讓，佛言，我哀愍汝等諸天人民，甚於父母念子，今我於此世作佛，降化五惡，消除五痛，絕滅五燒，以善攻惡，拔生死之苦，令獲五德，升無爲之安，吾去世後，經道漸滅，人民諂僞，復爲衆惡，五燒五痛，還如前法，久後轉劇，不可悉說，我但爲汝略言之耳，佛語彌勒，汝等各善思之，轉相教誡，如佛經法，無得犯也，於是彌勒菩薩合掌白佛言，佛所說甚善，世人實爾，如來普慈哀愍，悉令度脫，受佛熏誨，不敢違失。

本節文，如來勸修，彌勒領解。文中初段以理正勸，從「佛言我哀愍汝等諸天人民下、至升無爲之安」，舉佛化益以勸。從「吾去世後下、至無得犯也」，舉佛滅後衰損以勸。「主上爲善，率化其下」：推己及人，自利利他。「布施惠勿犯道禁忍辱精進一心智慧」：六波羅密。「齋戒清淨一日一夜勝在無量壽國爲善百歲。於此修善十日十夜勝於他方諸佛國中爲善千歲」：顯五濁惡世爲善難。「國邑丘聚」：周制四井爲邑（方二里）九夫爲井（方一里）八家一井，小鄉爲聚落。「世人實爾」：領解娑婆濁惡令人厭捨。

佛告阿難，汝起更整衣服，合掌恭敬，禮無量壽佛，十方國土諸佛如來，常共稱揚讚歎彼佛無著無礙。於是阿難起整衣服，正身西向，恭敬合掌，五體投地，禮無量壽佛，白言，世尊，願見彼佛安樂國土，及諸菩薩聲聞大衆。說是語已，即時無量壽佛放大光明，普照一切諸佛世界，金剛圍山，須彌山王，大小諸山，一切所有，皆同一色，譬如劫水彌漫世界，其中萬物沈沒不現，混

養浩汗，唯見大水，彼佛光明亦復如是，聲聞菩薩一切光明皆悉隱蔽，唯見佛光明耀顯赫。爾時阿難，卽見無量壽佛威德巍巍，如須彌山王，高出一切諸世界上，相好光明靡不照耀，此會四衆一時悉見，彼見此土亦復如是。爾時佛告阿難及慈氏菩薩，汝見彼國從地已上至淨居天，其中所有微妙嚴淨自然之物，爲悉見否，阿難對曰，唯然已見，汝寧復聞無量壽佛大音宣布一切世界化衆生不，阿難對曰，唯然已聞，彼國人民乘百千由旬七寶宮殿，無所障礙，徧至十方供養諸佛，汝復見不，對曰已見，彼國人民有胎生者，汝復見不，對曰已見，其胎生者，所處宮殿，或百由旬，或五百由旬，各於其中受諸快樂，如忉利天上亦皆自然。

本節文雙彰無量壽國胎化二生，令人修捨。從「佛告阿難下至無著無礙」：顯十方共讚，勸阿難禮佛。「汝起」：從空出假。從「於是阿難下至聲聞大衆」：明阿難奉命設禮，並請願見。「正身西向」：身正心誠，西向，指歸處。「五體投地」：二手二足一頭沾接理地。從「說是語已下至明耀顯赫」：佛光普照，異相體同，喻顯法合可知。「混養」：上音慌。下音癢，深廣無涯。從「爾時阿難下至亦復如是」：初此見彼，後彼見此，顯淨穢雖殊不離自心。華嚴云：『諸佛一似大圓鏡，我身猶若摩尼珠，諸佛法身入我體，我身常入諸佛軀。』從「爾時佛告阿難下至如忉利天上亦皆自然」：如來四問，阿難四答已見聞。有胎生者，正顯胎生之失，應捨疑心念佛。

爾時慈氏菩薩白佛言世尊，何因何緣，彼國人民胎生化生，佛告慈氏，若有衆生，以疑惑心修諸功德，願生彼國，不了佛智，不思議智，不可稱智，大乘廣智，無等無倫最上勝智，於此諸智，疑惑不信，然猶信罪福修習善本，願生其國，此諸衆生，生彼宮殿，壽五百歲，常不見佛，不聞經法，不見菩薩聖衆，是故於彼

國土，謂之胎生，若有衆生，明信佛智，乃至勝智，作諸功德，信心廻向，此諸衆生，於七寶華中，自然化生，跏趺而坐，須臾之頃，身相光明，智慧功德，如諸菩薩具足成就。復次慈氏，他方諸大菩薩，發心欲見無量壽佛，恭敬供養，及諸菩薩聲聞聖衆，彼菩薩等，命終得生無量壽國，於七寶華中，自然化生，彌勒當知，彼化生者，智慧勝故，其胎生者，皆無智慧，於五百歲中，常不見佛，不聞經法，不見菩薩諸聲聞衆，無由供養於佛，不知菩薩法式，不得修習功德，當知此人宿世之時，無有智慧，疑惑所致。佛告彌勒，譬如轉輪聖王，有七寶牢獄，種種莊嚴，張設床帳，懸諸繒蓋，若有諸小王子，得罪於王，輒內彼獄中，繫以金鎖，供養飯食，衣服床蓐，華香伎樂，如轉輪王無所乏少，於意云何，此諸王子寧願彼處不，對曰，不也，但種種方便求諸大力，欲自勉出，佛告彌勒，此諸衆生亦復如是，以疑惑佛智故，生彼七寶宮殿，無有刑罰乃至一念惡事，但於五百歲中不見三寶，不得供養修諸善本，以此爲苦，雖有餘樂，猶不樂彼處，若此衆生識其本罪，深自悔責，求離彼處，卽得如意，往詣無量壽佛所，恭敬供養，亦得徧至無量無數諸餘佛所，修諸功德，彌勒當知，其有菩薩生疑惑者，爲失大利，是故應當明信諸佛無上智慧。

本節文明胎生之失，化生之得，使人厭捨願求。「復化生智慧勝故，其胎生者皆無智慧」：正明化生胎生之因。「佛智」：佛陀之智慧，梵云，阿耨多羅三藐三菩提。此云，無上正等正覺。又一切種智爲佛智別稱。「不思議智」：佛之智慧深廣而不可心思口議。「不可稱智」：佛智衆多稱說不盡。「大乘廣智」：佛智窮諸法源。「無等無倫最上勝智」：佛智無與倫匹。堅信心佛衆生三無差別，是心作佛，是心是佛，衆生三障全體是理，諸佛三身

無非性具。不見佛，不聞法，無由供養三寶爲疑城胎宮之苦。「識其本罪深自悔責。求離彼處。」：正教修捨。喻顯、輪王、喻彌陀。別室，喻疑城。

王子，喻疑者。金鎖，喻不見佛聞法修供養。「輒」：音折。「蓐」：音辱。

彌勒菩薩白佛言世尊，於此世界，有幾所不退菩薩，生彼佛國。佛告彌勒，於此世界有六十七億不退菩薩往生彼國，一一菩薩已曾供養無數諸佛，次如彌勒者也，諸小行菩薩，及修習小功德者，不可稱計皆當往生。佛告彌勒，不但我刹諸菩薩等往生彼國，他方佛土亦復知是，其第一佛名曰遠照，彼有百八十億菩薩，皆當往生。其第二佛名曰寶藏，彼有九十億菩薩，皆當往生。其第三佛，名曰無量音，彼有二百二十億菩薩，皆當往生。其第四佛，名曰甘露味，彼有二百五十億菩薩，皆當往生。其第五佛名曰龍勝，彼有十四億菩薩，皆當往生。其第六佛，名曰勝力，彼有萬四千菩薩，皆當往生。其第七佛名曰師子，彼有五百億菩薩，皆當往生。其第八佛名曰離垢光，彼有八十億菩薩，皆當往生。其第九佛名曰德首，彼有六十億菩薩，皆當往生，其第十佛名曰妙德山，彼有六十億菩薩，皆當往生。其第十一佛名曰人王，彼有十億菩薩，皆當往生。其第十二佛名曰無上華，彼有無數不可稱計諸菩薩衆，皆不退轉，智慧勇猛，已曾供養無量諸佛，於七日中，卽能攝取百千億劫大士所修堅固之法，斯等菩薩，皆當往生。其第十三佛名曰無畏。彼有七百九十億大菩薩衆，諸小菩薩及比丘等不可稱計，皆當往生。佛語彌勒，不但此十四佛國中諸菩薩等當往生也，十方世界無量佛國，其往生者亦復如是甚多無數，我但說十方諸佛名號，及菩薩比丘生彼國者，晝夜一劫尚未能盡，我今爲汝略說之耳。

本節文明非導三輩往生，諸菩薩亦往生彼國。「菩薩」：上求下化大道心者。有權實四教斷證不同。十三國連娑婆故曰：「十四佛國」。

智者大師讚淨土曰：『四十八願，莊嚴淨土，華池寶樹，易往無人，火車相現，一念改悔，尚得往生，況戒定熏修，聖行道力，實不唐捐。』上正宗分竟。

佛告彌勒，其有得聞彼佛名號，歡喜踴躍，乃至一念，當知此人爲得大利，則是具足無量功德，是故彌勒，設有大火充滿三千大千世界，要當過此，聞是經法，歡喜信樂，受持讀誦，如說修行，所以者何，多有菩薩欲聞此經而不能得，若有衆生聞此經者，於無上道終不退轉，是故應當專心信受，持誦說行。吾今爲諸衆生說此經法，令見無量壽佛，及其國土一切所有，所當爲者皆可求之，無得以我滅度之後，復生疑惑。當來之世，經道滅盡，我以慈悲哀愍，特留此經，止住百歲，其有衆生值斯經者，隨意所願，皆可得度。佛語彌勒，如來興世，難值難見，諸佛經道，難得難聞，菩薩勝法，諸波羅蜜，得聞亦難，遇善知識，聞法能行，此亦爲難，若聞斯經，信樂受持，難中之難，無過此難。是故我法，如是作、如是說、如是教，應當信順，如法修行。

本節文爲流通勸學。從「佛告彌勒下、至持誦說行」：如來歎經勸學。「要當過此聞是經法」：衝過大火聞法。從「吾今爲諸衆生下，至復生疑惑」：教人請決。從「當來之世下，至皆可得度」：明此經獨留百歲。大經顯性，聖教中深，故先滅。此經普被，濟凡中要，故後滅。「滅盡」：釋迦正法五百年，像法千歲，末法萬載，一切皆過，仍以此經開示淨土，令人願求，但僅留百歲。從「佛語彌勒下，至無過此難」：值佛難、聞法難、遇善知識難、聞法能行難、信樂受持更難。從「是故我法下，至如法修行」：結勸修學。彌陀願行身土，曰「如是作」。釋迦所說極樂依正，曰「如是說」。

教人往生，名「如是教」。「信順」：信佛說，不違心。「如法修行」：依教奉行。

爾時世尊說此經法，無量衆生，皆發無上正覺之心，萬二千那由他人，得清淨法眼，二十二億諸天人民，得阿那含果，八十萬比丘，漏盡意解，四十億菩薩，得不退轉，以弘誓功德而自莊嚴，於將來世當成正覺。爾時三千大千世界六種震動，大光普照十方國土，百千音樂自然而作，無量妙華，芬芬而降。佛說經已，彌勒菩薩及十方來諸菩薩衆，長老阿難，諸大聲聞，一切大衆，靡不歡喜。

本節文明流通得益。從「爾時世尊下，至當成正覺」：敘小大皆獲法益。「無上正覺之心」：菩提心。「清淨法眼」：小乘於見道觀見四眞諦，成須陀洹果，大乘菩薩於初地觀見二空理之智。「阿那含」：斷盡欲界見思，成不來果。「漏盡意解」：三界漏盡，能解心慮，成阿羅漢果。「以弘誓功德而自莊嚴」：大乘四宏願爲因地心。「當成正覺」：因心徹果覺。「長老」：德高臘長慧命之老比丘。十誦律曰：『佛言從今下座比丘喚上座言長老。』阿難爲佛十大弟子多聞第一，故稱長老。「一切大衆」：包括天龍八部。卷下終

中華民國七十年四月十二日講於臺北靜明念佛會



日期：二〇二〇年十二月六日
版本：2020.12.06
網址：<http://www.forlong.us>

